

DE *John Le Conte*
LA LYCANTHROPIE,
TRANSFORMATION, ET
EXTASE DES SORCIERS.

*Où les astuces du Diable sont mises tellement en
evidence, qu'il est presque impossible, voire
aux plus ignorants, de se laisser
dorenavant séduire.*

Avec la refutation des argumens contraires,
que Bodin allegue au 6. chap. du second
liure de sa Demonomanie, pour sou-
stenir la realité de ceste pretendue
transformation d'hommes
en bestes.

*Le tout composé par I. DE NYNAVLD,
Docteur en Medecine.*




A PARIS,
Chez NICOLAS ROUSSET, rue de la Pelle-
terie, près l'Horloge du Palais, à l'Image
S. Jacques, devant la Chaire de fer.

M. D C. X V.
Avec Privilege & Approbation.

25225.18.19.5* A 0 Y i A 3

TRAVELER'S



By exchange

**A MONSEIGNEVR,
MONSEIGNEVR**

**L'ILLVSTRISSIME ET
REVERENDISSIME IAC-
QUES, CARDINAL DV PER-
RON, Grand Aumosnier de
France, Archeuesque de
Sens, Primat des Gau-
les & de Germa-
nie, & c.**

MONSEIGNEVR,
*Entre toutes les choses qui sem-
blent dignes de grãde merueille au
commun peupl., la Lycanthropie
& le rapt de l'ame hors du corps,*

*tiennent facilement le premier rang, & non sans
cause: car d'autant plus que la chose surmonte
les sens, d'autant plus aussi est elle admirable à
l'homme animal C'est pourquoy le commun peu-
ple ne pouvant comprendre & apprendre les
causes d'une telle transformation, & en voyant*

4
néanmoins l'apparence confirmée par l'ordinaire
confession des Sorciers de faire le tout aux De-
mons: (refuge ordinaire des peu versés en la co-
gnoissance des causes) Opinion tres-impie, & la-
quelle ie pretends refuser par ce petit traicté, afin
de maintenir la gloire de Dieu, contre les ruses
du Diable, & ôster au peuple l'occasion de ne
plus pecher par ignorance.

Or d'autant que l'envie & la calumnie atta-
quent ordinairement ceux qui entreprennent quel-
que chose de grand, j'ay recours à vous, Mon-
seigneur, afin que vous me soyez un azile as-
seuré contre ceux qui me contrediront: La verité
que ie soustiens, la gloire de Dieu que ie main-
tiens me donnent assurance que vous ombrage-
rez de vostre faueur ce mien foible escrit, qui
ne peut respondre au merite de la matiere: face
mieux qui pourra, & en style plus relevé, quant
à moy ie me contenteray que vous approuviez
mon essay, & m'en tiendray assez recompensé
si vous daignez me tenir.

MONSEIGNEUR,

Vostre tres-humble & tres-
obeissant seruiteur I. D.
N Y N A V L D.



DE
LA LYCANTHROPIE.
TRANSFORMATION, ET
Extase des Sorciers.

*Que les hommes ne peuvent par aucun moyen du
Diable estre transformez en bestes, Item,
que le Diable ne peut separer l'ame du
corps des Sorciers, en sorte qu'a-
pres quelque temps elle re-
tourne en son corps,
Et Vire.*

CHAP. I.

QUOBIEN que le Diable, pour
acquiescer credit sur les humains,
en les destournant de Dieu,
tasche comme vn Singe mali-
cieux de contrefaire les ceuvres admira-

bles de nostre Dieu , si est - ce qu'il ne peut en aucune façon changer les essences des choses que par illusion; illusion toutesfois qui ne se peut estendre proprement que sur ceux qui sont ses esclaves , & quelquesfois par permission diuine , à cause de l'incredulité, sur les debiles en la foy Chrestienne : Quand donc les Sorcieres disent en leurs confessions quelles se sont muées en corbeaux , pies, loups, pourceaux , chats , souris & serpens , ou autres semblables animaux , & qu'estans sous la forme d'un corbeau, elles ont volé , croacé : sous la forme d'un serpent , rampé , & sous la forme d'un chat , sont entrées par des trous petits , & seulement proportionnez à la grosseur du corps d'un vray chat ; Item , que sous la forme d'un loup , elles ont couru les campagnes , deuoré des enfans , tué des brebis , & autres semblables choses , & le tout apres s'estre oingtes de certains onguents , que le Diable leur donne à cest vsage , C'en est qu'une pure fable & illusion du Diable , qui trompe ainsi les sens de ses esclaves , lesquels ont refuge

à luy : & tiens mesme que ceux qui croyent telles choses sont indignes du nom de Chrestien, & sont contempteurs de Dieu, puis qu'ils derogent à sa gloire, & l'ancantissent entant qu'en eux est, en luy donnant compaignon, ou attribuant tel, ou semblable pouuoir au Diable ennemy iuré de Dieu & du genre humain, qu'au Createur & Conseruateur de tout l'Vniuers.

Parquoy ils luy attribuent faussement le pouuoir de changer l'essence des choses, attendu que cela ne peut appartenir qu'à vn seul Dieu, lequel est ialoux de sa gloire, & ne la veut communiquer à ses creatures, comme ie demonstreray cy apres.

Pour donc destourner les infirmes en la foy Chrestienne de telles credulitez impies, ie rendray la cause de ces choses, & monstreray comme elles se font, & à quelles fins, commençant premierement par la Metamorphose des hommes en bestes, laquelle Bodin au 6. chap. du second liure de sa Demonomanie confirme & assure estre recelle, contre droit &

raison, & contre les maximes tant Theologiques, que Philosophiques

Contre les maximes Theologiques dis-
je, entant que c'est vn blaspheme de dire
& croire que réellement le Diable puisse
changer la nature des choses contre l'ha-
bilité naturelle que le Createur leur a
despartie, Que si cela estoit, il faudroit
establir deux principes, qui est vn autre
blaspheme: Il ne faut doncques pas esti-
mer que Dieu vueille communiquer aux
malins esprits (lesquels il a priuez de sa
grace, & adiugez au feu eternal) la puis-
sance de creer, ou changer l'essence des
choses, laquelle puissance il s'est reseruee
à luy seul; & mesme selon icelle en l'Es-
criture il est appellé, comme par excel-
lence, *le Createur*: De ceste puissance à
fait mention nostre Seigneur Iesus-
Christ, quand il dit que Dieu peut susci-
ter de pierres des enfans à Abraham; les-
quelles choses avec vn million d'autres
sont impossibles au Diable, selon l'Escri-
ture, & le commun consentement des
Theologiens: car il ne scauroit donner la
moindre vertu, ou proprieté à quelque
chose

chose que ce soit : encores moins peut il faire quelque chose de rien ; il ne scauroit aussi transmuier vn corps en sel, comme Dieu transmua la femme de Loth : Il ne peut veritablement transmuier les verges en Dragons , ny l'eau en sang , ny engendrer des grenoüilles , ny transmuier la poudre de la terre en poux, ny desioindre la mer pour passer au trauers des ondes, ny rendre douce l'eau qui est salée, ny la faire sortir en touchant contre la pierre; Toutes lesquelles choses neantmoins ont esté faites par Moyse : Il ne peut aussi amplifier les choses petites, comme nous voyons aduenir ordinairement aux graines, & autres choses créées de Dieu : Il ne peut rendre la veuë aux Aueugles, resusciter les morts, changer par sa vertu l'eau en vin, donner vie à aucune chose, comme fist nostre Seigneur Iesus-Christ : faire nager le fer, comme fist Elisée : Il ne peut aussi empescher, corrompre, ou destourner le cours naturel diuinement institué, ainsi que fist Iosué, combatant les Amorrhéens, & Isaye quand il asséura au Roy Ezechias qu'il

recouvreroit santé, & Iesus-Christ lors qu'il pendoit en l'arbre de la Croix: Il ne peut aussi restablir les choses du tout destruites; faire descendre la Lune du Ciel, aymer les gens de bien, haïr les méchans, cognoistre les pensées secrettes du cœur: Il ne peut se ruer dans le troupeau des pourceaux sans la permission de nostre Seigneur Iesus Christ, encores moins peut-il entrer dans les corps des hommes, selon la volonté, imprecation, ou maudisson de quelque Sorciere. Finalement il ne peut prevoir comment Dieu veut disposer des Creatures, des Empires & des choses particulieres, avant que Dieu en ait prononcé par sa bouche.

Comme ceste transformation pretendue par les Sorciers, repugne aux maximes Theologiques, Aussi repugne elle aux maximes Philosophiques, entant que les Philosophes croient & tiennent d'un commun accord qu'une espee ne peut estre transformée en une autre espee. Item, qu'une forme parfaite ne peut commigrer en une matiere rude & grossiere. Et à ceste cause Aristote dit que

tout corps est fait pour la forme, & selon la perfection d'icelle, & non au contraire, d'autant que le corps est instrument de la forme. Doncques comment est-ce que par la vertu d'un onguent, ou autres moyens du Diable, le corps d'une Sorciere se peut transformer en loup, ou autres animaux (car j'ay desia monstre que Metaphysiquement cela ne se pouroit faire que par le seul Createur de l'Univers) puis que les formes ne peuvent estre transformees en autres diuerfes formes.

Que si cela que les Sorciers affirment estoit vray, où il faudroit que la forme corporelle de l'homme se changeat en celle de loup, (ce qui ne se peut, comme j'ay monstre) ou que la forme du corps humain perit, & qu'apres suruint en la matiere la forme d'un loup: ce qui est tres-faux, car si ainsi estoit que la forme du corps humain perit, l'ame se separeroit du corps, & s'en iroit au lieu que Dieu a ordonné, & ne retourneroit plus. Or l'ame ne se peut separer du corps que premierement il ne soit priué de toutes les trois facultez naturelles, assauoir Vi-

rale, Animale, & Naturelle, car elles perissantes, la mort s'ensuit, & par consequent la separation de l'ame d'auec icelles, laquelle demeurant libre s'en retourne à sa source premiere, d'où elle ne retournera pour prendre corps, iusques à la resurrection des morts, comme tous vrays Chrestiens le croient.

Maintenant voyons si de la matiere de ce corps il se peut faire vn loup qui aye vie; Premièrement cela repugne à tout ordre de la nature, puisque nature ne peut engendrer, ou former vn tel corps animé d'vne matiere non animée par puissance, comme disent les Philosophes, Car tout ce qui prend estre, ou naissance, naist de quelque semence, ou sans semence, & est Vegetatif, ou Animal; De rechef ce qui est Vegetatif se multiplie & prend naissance par la semence de son espee, ou sans semence; Par la semence, quand elle est semée, ou d'elle-mesme, ou par autrui en temps opportun: Ce qui est sans semence se multiplie par ses racines, ou branches coupées & plantées en temps conuenable, afin que l'espee

ne perisse point, & ce par la prouidence de Dieu.

Quant aux Animaux, où ils sont parfaicts, ou imparfaicts; Les parfaicts ne se peuuent engendrer que par la propre semence du masle & de la femelle meslées en l'amarrhy par la copulation d'une mesme espee. Or est-il qu'il n'y a rien de semblable en ceste pretendué & phantastique transformation; Le concluds donc que ce n'est qu'une pure fable & illusion du Diable. Mais voyons comme vn abisme tire apres soy vn autre abisme, & comme vne absurdité posée, il s'en ensuit plusieurs autres non moins petites: Il faut doncques noter qu'ayans creu ceste transformation d'hommes en bestes, ils affirment & croient avec les Sorcieres qu'estans en forme de chats, corbeaux, ou serpens, ils peuuent entrer par des trous aux maisons, lesquels trous, ou charieres, ne sont toutesfois que de la grosseur de la forme qu'ils croient auoir emprunté: Chose du tout ridicule & monstrueuse de croire ces impostures, & qui ne meriteroit de soy qu'on luy respondist, at-

tendu que telle chose est autant impossible au Diable, comme il luy est de faire passer vn chable par le pertuis d'une esguille, ce que toutesfois nostre Sauueur a tenu pour chose impossible: Car le corps & tout ce qui est compris en vn lieu, & toute chose logée doit estre proportionnée à son lieu, Autrement il faudroit confesser qu'il y auroit penetration des corps, ce qui est contre la nature & tout principe de Physique; Icy quelqu'un pourra objecter que le corps transformé en chat n'est que de la grosseur d'un chat naturel, & que par consequent il peut entrer par les pertuis de sa grosseur: Mais à cela ie replique que le corps de l'homme solide composé d'os, de nerfs, artères, tendons, muscles, chair, membranes & peau ne peut estre réduit à vn si petit corps qu'est vn chat: Que si il est fait seulement d'une portion, ie demande que deuient l'autre, Car nul corps ne peut estre reduy à neant, ny aussi créé, ou transformé que par vn seul Dieu auteur & conseruateur de toutes les choses qui ont estre.

Quant à ce que nostre Seigneur Iesus-Christ entra à ses Disciples les portes estant fermées, à raison de la crainte que les Disciples auoient des Iuifs, ce n'est pas à dire que les Sorciers par le moyen du Diable puissent faire le semblable. Car qui seroit si impie & outre-cuidé de vouloir esgaler, ou faire comparaison de la puissance du Diable, (laquelle il n'a que par emprunt), à la toute puissance de Iesus Christ. Parquoy le Diable ne pourra rien faire des choses que nous auons dites cy-dessus, & encores moins qu'un mesme corps soit en vn mesme temps en diuers lieux, & qu'une Sorciere alle à la Synagogue en esprit seulement, & retourne ayant esté separé du corps, comme ie demonstreray, moyennant l'ayde de Dieu, cy apres en son lieu.

Maintenant suiuous le fil de nostre discours, & mettons en euidence l'artifice & cautelles de ce vieux Serpent ennemy de Dieu & du genre humain, qui par son orgueil se voulant esgaler à nostre Dieu, a esté precipité aux Enfers, & priué à iamais de sa grace. Son orgueil donc-

ques qui a esté la premiere cause de sa cheute, est aussi la cause de toutes ces illusions & impostures, car desesperant de retourner iamaïs en grace, il se bande contre l'Eternel, & tasche de seduire & destourner les hommes du seruice qu'ils doiuent à Dieu, pour les attirer à luy, & auoir plusieurs compagnons, (qui est la seule consolation des miserables) Or pour tant mieux ce faire, il tasche de contrefaire les œuvres de Dieu, pour en obscurcir & diminuer, s'il luy estoit possible, sa gloire & puissance, & establir par consequent la sienne par des faux miracles & illusions, & se rendre admirable, en se faisant adorer, prier, seruir & honorer comme Dieu, par les ignorans, payens, barbares & infideles qui ont preuariqué, & lesquels, sinon par vne particuliere grace de Dieu, difficilement sortiront d'entre ses pattes. Il ne se contente donc pas de les auoir vne fois seduits & gaignez, Mais pour tant mieux s'inthroniser par mespris de Dieu, tasche de seduire les fideles, s'il luy estoit possible, & ce cautelement, se seruant quelques fois

fois de ses esclaves qui sous ombre de quelque religion & pieté tascheront de persuader aux fidesles choses, qui en apparence sembleront aux simples, voire croiront estre telles, & qui neantmoins tirent apres elles vne grande consequence, car quand il a vne fois gaigné quelque chose sur vn hōme, cela luy sert de planche pour peu à peu s'introduire, & auoir entree, & perdre en fin vn tel homme, s'il n'est empesché d'ehaut. Quāt aux moyēs principaux desquels il se sert pour seduire les hommes, l'amy lecteur les verra au 9. chappitre de nostre liure intitulé de *spiritibus*.

Suffira à present de monstrier comme le Diable fait telles illusiōs en deux principales manieres. La premiere est en se glissant à cachette dedans la fantasie des hommes (si Dieu par vne grace speciale ne l'empesche) pour esmouuoir les humeurs & troubler les sens, faisant voir choses estranges, non qu'à la verité elles soient telles, car comme i'ay cy deuant prouué, il ne peut aucunement changer la nature des choses cōtre l'habilité natu-

relle que le Createur leur à despartie.

De ceste raison aucuns ne se contentent, mais obiecteront que le semblable se fait à tous hommes en dormant & songeant par causes naturelles, aſcauoir, comme quand la concoction se fait, les vapeurs grossieres montans au cerueau, troublent la faculté Imaginatieue, & imprimēt diuerſes figures, lesquelles apres le sommeil diſparoissent & desquelles la ſouuenance en eſt nulle, ou fort legere, ſi ce n'eſt que la vertu Imaginatieue eſtant fort debilitée il ne s'y imprime quelque choſe d'eſtrange & hideux, de ſorte que les ſens ayans eſté trauaillezz de telles viſions, on s'en reſente encores eſueillé, & par conſequent, on s'en ſouuienne longtemps apres, comme ſi en eſſeſt telles choſes euſſent eſté. Or la varieté de ces viſions eſt cauſée ſelon la diuerſité des vapeurs qui enſuiuent la nature de la viande qu'on mange, Car ſi elle eſt de dure diſteſtion, comme ſont chatagnes, poix, febues, ache, phafiois, oignons, porreaux, choux, lentilles, chair de pourceau lepreux, chair de bœuf ſallée, chair de che-

ures, boucs & autres sēblables, (desquel-
les la plus grand part des Sorcieres se re-
paissent) & qu'avec cē l'estomac soit de-
bilité, comme il est ordinairement aux
vieilles, à cause de l'imbecillité de la cha-
leur naturelle, toute la viande se réduit
presque en vapeurs grosses & espesses qui
troublent ainsi les sens, & depravent la
faculté Intellective, laquelle intentive
sur les objets & impressions faictes au
sens commun, les examine, d'estingue, &
finalēmēt cōclud facilēmēt des choses re-
ceues par l'imaginative au sens cōmun,
lesquelles en apres elle rēuoye à la partie
postérieure, ou est située la faculté me-
morative, cōme si ayāt reçu d'une main
de l'Imaginative, elle le bailloit de l'au-
tre à la Memorative thresoriere des cho-
ses appréhēdées par l'Imaginative, & des
cōclues par la Cogitative, ou Ratiocina-
tive, lesquelles elle garde fidèlement. A
cecy aidēt les quatre humeurs, ou cōple-
xions d'un chacun, & la crainte, ou desir
de mesure qu'on à de quelque chose. Car
volontiers ce qu'on à ouy lēu & veu, ou
qu'on craint fort, ou qu'on desire ardem-

ment en veillant, on le voit en dormant.

Entre toutes les quatre complexions des hommes les melancholiques sont plus subiects à voir choses estranges, tant en dormant, qu'en veillant, & de ceste complexion se sert le Diable, voire se mesle avec icelle pour espouuater & faire tomber les hommes en desespoit en leur rememorant leur pechez, & conuinquant par l'Escripture mesme, comme ie prouueray par exemples au liure de *Veneficis*, chapitre des Melancholiques & Insenséz.

Voila ce qui concerne les causes naturelles, selon lesquelles on peut voir choses qui ne sont point en effect, & qui le plus souuēt n'ont iamais esté, & lesquelles dans quelques temps apres on met facilement en oubly.

De ces causes naturelles n'auons delibéré parler, non plus que des melancholiques, & frenetiques, nonobstant que quelquesfois le Diable se mesle avec telles humeurs, pour rascher de seduire les vns, & faire precipiter les autres. Nostre but doncques est de parler des Sorciers, & Esclaues du Diable, auxquels le Diable

persuade telles choses par illussions affi-
duelles en leur troublant les sens, & es-
mouuant les humeurs, ou bien en vertu
de quelque onguent qu'il leur dōne pour
s'oingdre le corps, luy toutefois s'y entre-
messant secrettement, afin que n'estant
apperceu, on refere le tout à la vertu de
l'onguent, qui autrement ne peut agir
que naturellement, comme les choses
naturelles, cy-dessus mentionnées, &
comme ie monstrey plus particuliere-
ment en parlant des vertus propres &
impropres de cest onguent, le tout selon
les causes naturelles, puis qu'il est com-
posé de choses materielles & naturelles,
car par les matieres & causes naturelles
il ne se peut rien faire de supernaturel,
comme qu'en la vertu de cest onguent
l'ame se separe du corps sans preiudice
des facultez naturelles, & qu'apres elle
retourne & viue dans son corps, Autre-
ment ce seroit renuerser l'ordre de natu-
re, & confondre les choses naturelles
auec les diuines, accusant Dieu blasphe-
matoirement, ou d'impuissance, ou d'e-
stre auteur du mal d'impuissance, entant

qu'il lairoyt destruire (pour ne le pouuoir conseruer) lordre de nature, lequel luy mesme à estably, & conserue si estroictement, ne permettant iamais qu'il soit arresté, sinon à son grand honneur & confusion des meschans, comme quand à la priere de Iosué il arresta tout court le Soleil pour destruire les ennemis de son peuple, & en la mort & passion de nostre Redempteur il fit obscurcir & osta la lueur à plain midy au Soleil, en signe & tesmoignage de la diuinité de nostre Sauueur, & de son couroux contre les Iuifs qui auoient crucifié le Roy de gloire son fils bien aymé, auquel il auoit pris son bon plaisir: D'estte autheur du mal, celuy qui est Autheur de tout bien, & est la bonté mesme, entant qu'il autoriseroit le Diable separant à sa volonté l'ame du corps des Sorciers pour vn temps, (car luy seul, comme iay cy deuant dit, le peut faire, & non autre) afin de tant mieux & sans crainte d'estre descouuerts par la iustice humaine, ils puissent seruir au Diable en luy faisant hommage au grád mespris de Dieu & de sa parolle,

Iugez donc, amy lecteur, qu'elle impietè ce seroit de croire que Dieu auctorisat par son consentement telles impietez dieu, di-je, qui est ialoux de s^{on} h^{on}neur, & qui ne veut point que sa gloire soit cōmuniquée aux creatures, cōme nous voyons en Herode, qui pour s'estre attribué la gloire, laquelle est deuë a vn seul Dieu, feust incontinent mangé des poux par vne iuste vengeance diuine. Quel blasphemè dis-je seroit ce de croire que Dieu participat aux iniquitez des meschans? luy qui commande si estroictement en la Loy que telles gens soiēt deffaits & ostez de dessus la face de la terre; car il a non seulement en horreur les Sorciers, Enchanteurs, Deuins & Magiciens : mais aussi tous ceux qui ont recours à eux, & qui les croyēt, & veut mesme qu'ils soiēt puniz de mort. Par ou il appert assez clairement que le Diable ne peut separer l'ame du corps pour la y renvoyer par aucune vertu naturelle, ny mesme supernaturelle. Voyons maintenant qu'est-ce que tels onguents fabriquez par son artifice peuuent faire naturellement, puis qu'ils sōt cōpotez de choses materielles.



DES SIMPLES QUI EN-
TRENT EN LA COMPOSITION DES
Onguents des Sorciers & de leur
vertu en general.

CHAP. II.

ENtre tous les simples, desquels
le Diable se sert pour troubler
les sens de ses Esclaves, les sui-
uans semblent tenir le premier
rang, desquels aucuns ont vertu d'édormir
profondement, les autres legerement, ou
pointmais qui troublent, & tropent les sens
par diuerses figures & representations,
tant en veillant, qu'en dormant, comme
pouroit faire la racine de la belladonna,
morelle furieuse, sang de chauue fourris,
d'huppe, l'Aconit, la berle, la morelle
endormate, l'ache, la fuye, le pentaphilon,
l'acorum vulgaire, le persil, fucilles du
peu-

peuplier, l'opium, l'hyoscyame, cyguë, les especes de pauot, l'hyuroye, le *Synochytides*, qui fait voir les ombres des Enfers, c. d. les mauuais esprits, comme au contraire, l'*Anachitides* faict apparoir les images des saincts Anges: De toutes ces choses le Diable ne se contente, ains comme ennemy iuré du genre humain, pour tant mieux exercer sa cruauté & tyrannie, il persuade & induit les Sorciers à raur des petits enfans, pour d'iceux extraire la gresse, & en faire vn consommé pour meller dans ses onguents, non qu'à la verité telle gresse, ou consommé serue d'aucune chose en telles infernales, & diaboliques compositions: mais seulement pour exercer ses esclaués aux plus enormes pechez, & haine du genre humain, afin qu'estans plongez & accablez en l'abisme de leur iniquitez, ils ne puissent esperer repentance, ains perissent avec luy. Ayans donc fait de toutes les choses susdites, ou d'une partie d'icelles huyles, ou onguents, (n'oubliant en ceste composition l'inuocation particuliere de leur Demons, & ceremonies magiques

institutees par iceux) ils s'en oignent toutes les parties du corps, apres les auoir frotees iusques à rougir, afin que les pores estans ouuerts & relaxez, l'huyle ou onguent penetre plus fort. Voila les simples, outre plusieurs autres, par lesquels l'entendement est osté, ou du tout trouble, tellement que celuy qui en vsera, semblera estre fol en parlant, en oyant & respondant, ou bien tombera en vn profond sommeil, & demeurera insensible, pendant quelques heures, ou iout, il ne faut pas oublier qu'avec ces choses le Diable ne s'y entremesse pour iouer son personnage. Or ce n'est pas assez d'auoir descri les choses en general qui ont telle, ou approchante vertu, si nous ne monstons plus particulierement le triple usage de tels onguents, afin de tant mieux esclaircir ce subiect, & oster toute doute qu'on pourroit faire.





DE LA COMPOSITION

Et Usage du premier onguent
des Sorciers.

CHAP. III.

NOus auons dit cy deuant que les Sorcieres qui sont de marque, ou, pour mieux dire, qui appartiennent à gens de marque & d'autorité, n'osent aller en corps en leur synagogues, de peur d'estre recogneues des autres, & par consequent estre accusees & diffamees par vn iuste supplice.

Pour obuier à cecy le Diable caut & rusé, leur a persuadé qu'elles y iroient seulement en esprit, à condition qu'elles s'oignissent d'un onguent composé de son artifice, par la vertu duquel l'ame se separeroit du corps pour quelques heu-

res, & s'en iroient au lieu par luy assigné, le corps demeurant en leurs liets auprès de leur marys, ou autres, de peur qu'ils ne s'apperçeussent de leur absence. Mais examinons la composition d'un tel, ou semblable onguent, & voyons que naturellement il peut faire: Il est donc composé de gresse d'enfant, de suc d'ache, d'aconit, de pentaphilon, de la morelle endormante, & de la suye, &c. ou d'autres choses semblables qui ont vertu d'endormir, & faire voir en dormant choses estranges. Ce n'est donc de merueille si après s'estre frotées toutes les parties du corps iusques à rougir, & après oingtes d'un tel onguent, il leur semble (à quoy leur ayde leur fole croyance & intention) estre portées en l'air à mesure que l'onguent penetre & monte au cerueau, & qu'après qu'il a troublé les sens, & est entierement monté au cerueau, il le remplisse de diuerses figures, de sorte qu'il leur semble voir des theatres, des beaux iardins, des banquets, des beaux ornemens, des vestemens, des Roys, des Magistrats, il leur semble aussi entendre

des musiques, estre aux dances, & aux embrassemens des plus beaux ieunes hōmes qu'elles desirent, Elles voyent aussi des Diables, des corbeaux, des prisons, des deserts, des tourmens, & mesmes toutes les choses auxquelles elles se delictent, & dont elles pensent auoir iouissance, ou qu'elles apprehendent. Voila les causes de ces songes violens, qui font qu'en dormant elles pensent estre portees en diuerses regions, & auoir plusieurs affections selon la complexion d'une chacune d'icelles, & intention du Diable, qui par l'aide de l'onguent moyenne toutes ces choses, à quoy nous pourrons adiouster que l'effect de telles impressions violentes, & frequentes, deprauent tellement la temperature du cerueau, que mesme en apres les esprits en sont alterez, & iour & nuict ne pēsent à autre chose, outre ce que de leur naturelle inclination elles sont coustumieres à croire de leger: Pour confirmation dequoy, nous mettrons en auant vn exemple, lequel Iean Baptiste de la Porte Neapolitain, homme tres-docte & tres-sub-

an Jap.
26.

til rechercheur des causes naturelles, a mis en son second liure de la Magie Naturelle, qui est tel que s'ensuit.

La desbordée cupidité, dit il, a tellement gagné l'entendement des hommes que mesme ils abusent des choses que la nature leur a donnees pour leur commodité, si bien que les Sorcieres composent des onguents de plusieurs choses superstitieuses, mais qui regardera de prés verra que les effects procedent de la vertu naturelle; Ce dit, il raconte ce qu'il a entendu d'elles que ie tairay pour le present: finalement il vient à raconter l'exemple, adioustant. Ainsi que ie mefforçois de descouvrir ces choses plus soigneusement (car i'en estois encores en doute) ie rencontray vne certaine vieille du nombre de celles qu'on nôme Sorcieres & qui succent le sang des petits enfans aux berceaux: C'este vieille de sa propre volonté me promet qu'en brief elle m'en donneroit response, commandant que tous ceux qui estoient avec moy & qui eussent peu servir de tesmoins, sortissēt dehors, ce qui fut fait, puis nous

la vismes par les fentes de la porte qu'elle se frotta tout le corps d'un onguent: Or comme elle tomba en terre par la vertu de l'onguent endormant & entra en un sommeil très profond, nous ouurismes la porte, & entrasmes dedans, puis la commençasmes à frapper, mais son sommeil étoit si fort qu'elle n'en sentit rien. Ainsi nous retournasmes hors la porte, & cependant la force des onguents estans diminuée, elle se resueilla, & nous contempla plusieurs folies, assavoir qu'elle auoit passé la mer, & les montagnes, & rien ne nous respondoit qui ne feust faux, nous luy nions tout, mais elle l'affermoit davantage, & encores que nous luy monstissions les marques des batures, si est ce qu'elle s'obstinoit d'auantage.

Reste maintenant à respondre à vne objection qu'on nous pouroit faire, sçauoir est qu'on a obserué, & mesme de mon temps, en plusieurs Sorcieres qu'estans ainsi tombees par terre, ou qu'estans desia profondement endormies par la vertu de ce onguent, que si on les veille & garde soigneusement, qu'au bout de quel-

26. ques heures, leur esprit, comme elles disent, retourne en forme de moufche ignee, faisant vn petit bruit à l'êtree (car il entre par la bouche, laquelle demeure tousiours à demy ouuerte) & qu'estant entré, soudain la Sorciere se resueille, comme par ce moyen plusieurs desia soubçonnees, ont esté decouuertes, & d'icelles mesme en ay veu brusler quelques vnes. Pour cōfirmation de ce que dessus, on tient que si on leur ferme la bouche, & qu'on les renuerse ce dessus dessous, en sorte qu'il n'y aye aucune entree, que l'esprit retournant & ne trouuât entree, qu'apres auoir fait quelque bruit & voleté tout à l'entour de la teste, ils'en retourne & plus n'apparoit, de sorte que le corps demeure mort sans aucun mouuement.

Auant que respondre à ceste obiection, il nous conuient sçauoir que comme le Diable ne tasche qu'à contrecarer les œuures admirables de nostre Dieu par des faux miracles (car de soy-mesme il ne fait rien de vray, ny de bon, mais seulement en apparence) pour obscurcir, voire
aneantir,

ancantir, s'il luy estoit possible, sa gloire. Aussi pour ce faire, il luy conuient, (de peur que ses piperies & impostures ne se manifestent) tenir les hommes en ignorance, afin qu'il soit glorifié des siens, & admiré des ignorans. C'est pourquoy voyant quelques vns en erreur, comme de croire que les ames puissent estre separées des corps, & y rentrer à la volonté des Sorcieres, &c. il tasche de les y confirmer par vray semblables, mais toutes-fois tres-fausles demonstrations, comme ie demonstreray en respondant à ceste obiection. Car quel'ame se puisse separer du corps pour y rentrer dans quelques heures, cela est tres-faux, comme nous l'auons cy dessus prouué. Que ceste mouscheignée qui entre dans les Sorcieres, soit leur ame, cela est aussi faux, car l'ame est inuisible; Que si elle estoit corporelle, elle seroit aussi necessairement mortelle, qui est vne autre fausseté, comme i'ay démontré assez au long en nostre liure de *Anima*; Que le corps de la Sorciere se refueille tost apres que la mousche est entree, cela ne conclud rien, d'autant

ques heures, leur esprit, comme elles disent, retourne en forme de mousche ignee, faisant vn petit bruit à l'êtree (car il entre par la bouche, laquelle demeure tousiours à demy ouuerte) & qu'estant entré, soudain la Sorciere se resueille, comme par ce moyen plusieurs desia soubçonnees, ont esté decouuertes, & d'icelles mesme en ay veu brusler quelques vnes. Pour cōfirmation de ce que dessus, on tient que si on leur ferme la bouche, & qu'on les renuerse ce dessus dessous, en sorte qu'il n'y aye aucune entree, que l'esprit retournant & ne trouuât entree, qu'apres auoir fait quelque bruit & voleté tout à l'entour de la teste, ils'en retourne & plus n'apparoit, de sorte que le corps demeure mort sans aucun mouuement.

Auant que respondre à ceste obiection, il nous conuient sçauoir que comme le Diable ne tasche qu'à contrecarer les œeures admirables de nostre Dieu par des faux miracles (car de soy-mesme il ne fait rien de vray, ny de bon, mais seulement en apparence) pour obscurcir, voire
aneantir,

aneantir, s'il luy estoit possible, sa gloire. Aussi pour ce faire, il luy conuient, (de peur que ses piperies & impostures ne se manifestent) tenir les hommes en ignorance, afin qu'il soit glorifié des siens, & admiré des ignorans. C'est pourquoy voyant quelques vns en erreur, comme de croire que les ames puissent estre separées des corps, & y rentrer à la volonté des Sorcieres, &c. il tasche de les y confirmer par vray semblables, mais toutes-fois tres-fausse demonstrations, comme ie demonstreray en respondant à ceste obiection. Car que l'ame se puisse separer du corps pour y rentrer dans quelques heures, cela est tres-faux, comme nous l'auons cy dessus prouué. Que ceste mouscheignée qui entre dans les Sorcieres, soit leur ame, cela est aussi faux, car l'ame est inuisible; Que si elle estoit corporelle, elle seroit aussi necessairement mortelle, qui est vne autre fausseté, comme i'ay démontré assez au long en nostre liure de *Anima*; Que le corps de la Sorciere se resueille tost apres que la mousche est entrée, cela ne conclud rien, d'autant

qu'il n'est pas mal aisé au Diable (la vertu de l'onguent se commençant desia à diminuer,) de dissiper & chasser le reste des vapeurs du cerueau, esmouuoir les humeurs, & exciter les sens à faire leurs fonctions. D'où nous concluons que c'est le Diable, lequel sous ceste forme veut tromper & confirmer en erreur les assistans, & par le mesme moyen autoriser la confession de ses esclaves; Ioint que ceste forme luy est fort familiere, & mesmes selon icelle il est appelé en l'Ecriture sainte *Bèelzebu*, c. d. Prince des mouches: car nous ne lisons pas qu'aucun bon Esprit aye iamais emprunté ceste forme, ny d'aucun autre Animal imparfait.

Comme donc ceste obiection est faulse, semblable aussi est la preuue, Car ce n'est chose esmetueillable qu'un corps enseueli dans vn profond sommeil, meure, quand on luy empesche la respiration, laquelle pour lors est fort petite, & par consequent plus aisée à estre supprimée, Ioint que lors nature est comme oyseuse & assoupie par les vapeurs narcotiques de cest onguent; C'est pourquoy l'air qui de

soy & sans grande attraction entretenoit les esprits vitaux & les poulmons, estant empesché par la closture des conduits, ou fouspiraux à ce destinez, & le corps contre sa nature renuersé, facilement la nature estant priuee du moyen par lequel elle exerçoit ses fonctions, & comme toute perturbée par la grande confusion qui se fait en vn instant des esprits vitaux & des vapeurs narcotiques de cest onguent qui tiennent assiegé le cerueau, elle succombe, & ainsi perit la Sorciere, les assistans en estant homicides sans y penser.

E ij





DE LA COMPOSITION

*Et Usage du second onguent
des Sorciers.*

CHAP. IIII.

V E N O N S maintenant au second onguent, par la vertu duquel le Diable persuade aux Sorcieres apres s'estre ointes pouuoir en mettant vn balay, ou baston être les iâbes cheuaucher en l'air, & aller en leur synagogues d'une viffesse incredible en passât par la cheminee. Ce que assez legerement Cardan & Baptiste Porte avec quelques autres sçauans hommes ont denié, affirmans que cela ne se faisoit par illusion en vertu des onguens: ce que i'ose nier, & prouuer cy apres le contraire, mais que premierement i'aye nié que

cela se face par la vertu d'aucun onguent, encore que le Diable vueille qu'elles s'en seruent pour les tant mieux disposer à son seruice en troublant leur sens, afin qu'estans ainsi abruties, elles facent ce qu'autrement estant en leur sens rassis, elles n'oseroient entreprendre, ny mesme penser, quoy qu'elles soient du tout meschantes, la souuenance desquelles choses estant retournees à elles, les rend le plus souuent tellement confuses, qu'elles n'osent regarder en face les gens de bien, mais vont à teste baissée, d'autant qu'elles ont honte de leur turpitude, & ne peuuent soustenir le regard constant des gens de bien sans baisser la face, & pour ceste cause elles sont flatueuses, bigotes, solitaires, superstitieuses, laides, puantes & sales.

Or auât que passer plus outre, il faut remarquer qu'en la composition de cest onguent il n'entre point de simples narcotiques, Mais seulement qui ont vertu de troubler les sens en les alienant, comme pour exemple, le vin pris de mesurement, la belle done, la ceruelle de chat,

& autres choses que ie tairay, de peur de donner occasion aux meschans de faire mal, de sorte que ce transport ne se fait pas simplement par illusion estant endormy profondement, comme nous auons obserué discourant de la vertu du premier onguent par les causes naturelles, mais aussi reellement, non pas en vertu de cest onguent, mais par l'ayde du Diable qui les emporte veillantes. ou bon luy semble, tout ainsi qu'il faiet les Magiciens par l'air, comme cela n'est que trop commun. Car il faut noter que le Diable peut ce faire, entant que Dieu a liuré des-ja telles gens en sens reprocé, de sorte qu'estans faicts esclaués du Diable, il les peut emporter par l'air d'vne vistesse esmerueillable.

Je ne peu donc croire qu'aucun soit tant despourueu de sens de nier qu'il ne puisse enleuer yn corps de terre pour le porter par l'air; car encores qu'il soit descheu de la grace de Dieu par son orgueil, siest ce qu'il peut beaucoup, ayant esgard à la noblesse, excellence & puissance de la nature qu'il a receüe, non pas que ceste

puissance s'estende sur les bons ; qu'au contrainceuegard à eux, elle est limitée & tenuë en bride, si ce n'est extraordinairement, comme quand Dieu voulut exercer la patience de Iob, il lascha la bride à Sathan pour l'affliger en sa personne, en la perte de ses biens & de ses enfans, toutesfois avec desfence qu'il ne touchast à sa vie. Ce n'est donc de ceste puissance que nous parlons, mais de celle qu'il a absolument sur les meschans, pendant qu'ils sont en estat de damnation, & auant qu'ils se soient repentis & conuertis au Seigneur, laquelle alors cesse.

Or pour reuenir au transport des Sorcieres, nous adiousterons que c'est se mocquer de l'Histoire Euangelique, de reuoquer en doute si le Diable transporte les Sorcieres d'un lieu en autre, puis que nous lisons en l'Euangile que Sathan transporta nostre Seigneur Iesus-Christ sur le pinacle du Temple, & sur la cime de la montagne, Item, que l'Ange emportat Abacuc le Prophete en Babylone : comme aussi Elie & Enoch aux Cieux en corps & en ame, outre lesquels

exemples nous en auons vne infinité d'autres, entre lesquels celuy d'Apollonius Thianeus est fort remarquable, lequel comme nous lisons en Philostrate auteur Grec, fut transporté en peu d'heures d'Æthiopie pres la source du Nil, iusques à Rome; Item, vne autre fois de Rome, à Corinthe; Plus, vne autrefois de Smirne, en Ephese.

On lit aussi que l'an 1271. Iean Teuthonich Prestre d'Albarstard des plus fameux Sorciers de son aage chanta trois Messes à minuiet, l'une à Albarstard, l'autre à Mayence: la troisieme à Cologne. Plutarque aussi fait mention d'un transport semblable fait de Grece en Crotone pres de Naples: ce qu'on recite aussi de Pythagoras qui fut transporté de Thussie en Methapont; & en ces derniers temps de Faustus, qui fut transporté avec certains autres de Basle en Suisse, à Rome: & d'un autre Magicien de Dole en Bourgogne, à Bordeaux.

Nous pourrions icy adiouster vn grand nombre de tels & semblables transports faits de nostre temps, tant en Sauoye, Suisse,

Suisse, Alemagne, France, Espagne & Italie, n'estoit que la chose est assez claire d'elle-mesme, Car ie ne croy pas que personne reuoque plus cela en doubte, puisque tous les anciens Theologiens soubscrivent à cela, quand ils disent que les Diables avec les forces de leur nature, & par la permission de Dieu peuuent faire les choses qui peuuent estre faites par vn mouuement local, & conionction conuenable des choses agentes, & patientes: mais qu'il ne peuuent aucunement changer la nature des choses contre l'habilité naturelle que le Createur leur a despartie. Pour preuue & confirmation du transport des Sorcieres en corps & en ame, i'adiousteray, auant que clore ce chapitre, l'Histoire d'un transport faict de nostre temps, lequel m'a semblé entre vn million d'autres, digne d'estre mis en lumiere, afin que les curieux apprennent à se contenir entre les limites de raison, & ne s'enquerir trop curieusement des choses illicites qui ne peuuent apporter & causer que malheurs, entant qu'elles sont prohibees de

Dieu par sa parole, à laquelle seule il faut s'arrester pour viure, l'Histoire est telle.

L'an 1603. au moys d'Aouſt, moy demeurant à Anaut ville celebre eſloignee enuiron de quatre heures de chemin de Francfort, me ſuruint quelques vlceres aux pieds avec grande tumeur œdema-teuſe, laquelle s'augmentant d'heure à heure, ie fus contraint d'appeller vn certain ieune homme de Francfort Chirur-gien de ſon eſtat, iouial & facetieux au poſſible, mais qui auoit eſté fort curieux, comme de ſa propre bouche il me racon-ta vn traict entre autres de ſa curioſité, aſſauoir qu'ayant ouy parlé ſi ſouuent des Sorcieres qui vont de nuict par l'air en leur Synagogues, ou elles danſent, ſau-tent, banquettent, paillardent, & ren-dent compte des meſchancetez qu'elles ont commiſes à l'inſtigation de leur mai-ſtre (lequel bat celles qui n'en ont aſſez fait, & louë & exhorte celles qui en ont fait à en faire dauantage,) eut moult en-uie de trouuer le moyen d'y aller pour ſçauoir la verité de ces choſes, pourquoy effectuer, il ſ'adreſſa à yne ſienne tante

de Francfort, laquelle estoit soubçonnée d'estre Sorciere, & la prie instamment de luy confesser la verité, ce qu'elle nioit fort, & mesme le menaçoit, Mais luy pour l'extreme desir qu'il auoit d'assouir sa damnable curiosité, ne laissoit pour les menaces à l'importuner & supplier qu'elle luy confessasse la verité avec protestations & iuremens de ne la deceler. Elle en fin pressée & comme contraincte par les prieres & sollicitations importunes de son Nepueu, luy confessa qu'elle estoit Sorciere, dequoy luy non encores content, l'interrogea quand elle iroit à la Synagogue, à quoy avec quelque petite difficulté, elle respondit que ce seroit au Ieudy prochain. Ce que son Nepueu ayant entendu, ne desista point qu'il n'eut impetré d'elle, ou qu'elle permit qu'il y allat ensemble, ou bien qu'il se trouuat en sa maison la nuit de son despart, d'y aller ensemble luy fust desnié, seulement luy fust concedé se trouuer à son despart.

La nuit du Ieudy arriuee, sur les vnze heures quitta son Nepueu & entra dans

vne autre chambre avec de la lumiere, ou estant elle se despoüilla & print vne bouëte d'onguent qu'elle tenoit, cachee dans la muraille, duquel (apres s'estre bien frotée tout le corps,) elle s'en oignit, puis print vn baston entre les iambes, quoy fait, elle disparut estant emportee en l'air à quatre lieues loin de Francfort delà le Rhein.

Ce ieune homme l'ayant espiee secretement & prins garde à ce qu'elle faisoit, regardant par vn trou de la porte, entra soudain en la chambre apres qu'elle fust disparue, & fit de mesme qu'elle, ce fait, le Diable en forme de tourbillon l'enleua aussi par la cheminee & l'emporta au mesme lieu que la Tante estoit, lequel ayant recogneu fust fort estonnee, & s'approcha de luy pour sçauoir comme il estoit là venu, ce que luy ayant confessé franchement, elle luy defendit de ne craindre aucunement l'homme qui estoit au milieu d'elles habillé de noir, & pour plus grande assurance luy enoignit le silence, & engraisa le bout de son baston d'un onguent que le Diable luy

auoit donné. Or ainsi comme ils dansoient en rondau, ce pauvre se tenoit tousiours en vn coing bien estonné, car le Diable le regardoit si aphyreusement que les poils de la teste luy en herissoient, mais il estoit contraint à mauvais ieu tenir bonne mine, de peur qu'il ne demeurat au lieu pour proye.

L'assemblée finie deux heures apres la minuit & le Diable les ayans toutes emportées, comme deuant, iusques aupres du Rhein, il print la forme d'un Veau, & les passa toutes l'une apres l'autre. Ce voyant la Tante, s'approche de son Nepueu encore ieune apprentif en la Diabologie, & luy commande de ne craindre point, mais qu'il montast hardiment sur ce veau sans sonner mot: la Tante passée, & le Nepueu demeurant seul à passer, le veau s'approche de luy pour ne rien oublier, sur lequel estant monté, le bon du ieu fut, que ce Veau estant sur le bord du Rhein, pour se mocquer & punir par vne iuste permission de Dieu ceste detestable curiosité, ietta en haut ce gentil cheuaucheur au milieu

du Rhein, en criant par irrision, *Voila vn beau fault pour vn Veau.* Qui fut bien estonné, ce fut mon vilain Chirurgien, qui apres auoir beu sans soif, & sans mesure taschoit à se sauuer à la nage, mais il ne peut si bien faire que le Rhein par sa vitesse ne l'emportat à l'enuiron d'une lieuë loing pres d'un moulin où il fut apperceu sur le iour par le Meusnier, lequel avec vn petit esquif s'efforça de le sauuer & tirer de l'eau, car il n'en pouuoit plus, & estoit plus mort que vif, Ce fait, le Meusnier avec ses seruiteurs le pendirent par les pieds pour luy faire regorger l'eau qu'il auoit beuë de mesurement, bref il fit tant qu'il reuint peu à peu à soy, & ayant recouré le parler, & reprins force, raconta le tout, & promit avec iuremens mettre fin à toutes ses curiositez demandant pardon à Dieu du passé, avec promesses qu'il viuroit plus sainctement à l'aduenir.

Arriué à Francfort, il diuulgà sa Tante, mais qu'on ne brusla point, d'autant qu'ils croyent cela estre fables, & refueries, ioint que d'ailleurs vne bonne partie

des plus riches y auroient interest , lesquels sont soupçonnez , & monstrez au doigt.

Voila l'Histoire que ce Chirurgien m'a raconté & confirmé avec iuremens en presence de gens d'honneur , en laquelle on peut remarquer quatre choses notables , assavoir vne curiosité damnable, les ruses du Diable , la punition des curieux , & la misericorde de Dieu qui se demonstret en sauuant , & deliurant miraculeusement cet homme , & des pattes du Diable , & des eaux profondes , dans lesquelles il l'auoit precipité pour le perdre & suffoquer , si Dieu par sa misericorde n'eust eu pitié de luy en l'article de sa mort , ne voulant ainsi perdre ce ieune homme. Par ou nous auons à apprendre que c'est luy seul qui peut sauuer l'ame & le corps , puis qu'il est l'auteur de vie , & que combien que le Diable aye puissance sur les corps des meschans qui sont en estat de perdition , qu'il se puisse iouer d'eux , & les boureler , ou tyranniser pour vn temps , si est-ce qu'il n'a pas puissance sur leur vie , car Dieu fait misericorde à

qui bon luy semble, voire à l'article de la mort, en rappellât de mort à vie ceux lesquels par vne particuliere & speciale grace il veut sauuer, ne voulant point la mort du pecheur, mais qu'il se repente & conuertisse à luy : Car le Diable n'est qu'exécuteur de la haute Iustice pour punir en ce monde, ou au corps, ou aux biens ceux qui ont peché contre le Dieu vivant, lequel ne permet iamais que si enormes meschancetez demeurent impunies, & quoy que quelquesfois il semble dilayer le chastiment, si est-ce que, ou en ce monde, ou en l'autre, on n'euadera point sa iuste punition.

Icy donc apprennent tous curieux à mettre fin à leur infames curiositez, & estre sages à sobriété, de peur qu'il ne leur aduienne le semblable qu'au Chirurgien susdit, voire pire, si Dieu n'a pitié d'eux.

*Nam facilis descensus Auerni,
Sed reuocare gradum, superasq; euadere ad auras,
Hoc opus, hic labor est.*

Car il n'est pas au pouuoir de l'homme apres estre vne fois tombé entre les patres du

res du Diable de s'en desuelopper, si
Dieu par vne speciale grace ne luy rend
la main pour l'en retirer, d'autant que la
repentance est vn don de Dieu special:
mais qui est celuy qui se peut promettre
que Dieu luy donnera repentance apres
luy auoir ainsi tourné le dos & mesprisé
sa parole? puis qu'il n'est du voulant, ny
du courant: mais de Dieu qui fait mise-
ricorde? Adherons donc à luy seul & à sa
parole, afin que nous viuions: car hors
de sa parole il n'y a que mort & condam-
nation.

G





DE LA COMPOSITION

*De l'usage du troisieme onguent
des Sorciers.*

CHAP. V.

AYANT discoursu cy dessus assez amplement des vertus tant propres, que impropres du premier & secõd onguent, dequels les Sorcieres se seruent pour aller, ou en corps, ou en esprit en leur assembles nocturnes, Reste finalement à parler du troisieme que le Diable donne aux Sorcieres, leur persuadant qu'après qu'elles s'en seront oingtes, elles seront vraiment transformees en bestes, & ainsi pourront courir les champs. Quant à la realité pretendue par les Sorcieres & sacrileges de la gloire de Dieu, j'ay assez amplement monstré qu'elle ne

se pouuoit faire que par illusions diaboliques : Mais voyons maintenant s'il se peut faire que naturellement par quelques onguens, ou potions l'entendement de l'homme puisse estre tellement peruertie qu'il croye estre veritablement transformé en beste en veillant.

Quant aux onguens, ils peuuent estre composez de certaines choses prises d'un crapaut, d'un serpent, d'un herisson, d'un loup, d'un renard, & du sang humain, &c. meslees avec herbes, racines & autres choses semblables, qui ont vertu de troubler & deceuoir l'imaginatiue. Car, comme i'ay dit cy deuant, le Diable dispose tousiours les Sorcieres par quelques choses prises interieurement, ou bien appliquees à l'exterieur, afin qu'ayant l'esprit, & les sens troublez par les figures de tels animaux, elles croient en prendre la forme en vertu de telles choses, comme le Diable leur a persuadé, quoy croyans, elles sont appareillees, & faites organes idoines au malin Esprit, pour entrer en elles, afin de parfaire sa meschante volonte, & les confirmer en

erreur, en contrefaisant les mesmes choses que les bestes font, desquelles elles ont emprunté la forme, comme pour exemple, si elles sont sous la forme d'un loup, elles courent par les bois, se ruent sur les bestes, & le plus souvent sur les hommes desarmez & enfans qu'elles ravissent & deuorent, comme i'en monstrey un exemple du rapt d'un enfant qui fut fait l'an 1604. à un village nommé Cressi, distant d'une lieue de la Cité de Laufane, duquel l'histoire est telle que s'ensuit.

Un villageois battant du bled en sa grange estoit fort importuné par un sien petit enfant qui luy demandoit à boire, dequoy le pere ne tenant conte pour l'affection qu'il auoit à son œuure, le petit enfant fut occasionné d'insister de plus fort à demander à boire avec pleurs & cris: Ce que voyant le pere fut irrité, & menaça l'enfant, dequoy ne se souciant, mais au contraire augmentant ses pleurs & ses cris, en fin le pere tout bouffi de courroux, luy dit en ces propres mots, *Lo Diabolo te beue*, c. d. le Diable te boiue: Ce

prononcé, il se passa encore du depuis quelques iours avant que l'exécution s'en fist, laquelle toutesfois ne retarda que iulques au Vendredy suiuant, car le leudy au soir la synagogue des Sorcieres estant tenue selon leur coustume, le Diable par vne iuste punition & permission de Dieu (lequel, comme i'ay dit cy dessus, ne laisse iamais si enormes pechez impunis) disposa cinq Sorcieres, ausquelles il auoit communiqué son dessein, par tels onguens, lesquelles sous sa conduite, & sous la forme de loup rauirent en plein iour l'enfant, lequel pour lors estoit sur le sucil de la porte, puis l'emporterent au lieu, ou leur complices les attendoient, ou arriuees elles reprindrent la forme de femmes; & le Diable en presence de toutes succea tout le sang de cest enfant par le gros doigt du pied, puis descouperent le corps en pieces pour le faire bouillir dans vn chauderon, duquel elles en mangerent vne partie, & de l'autre en composerent leurs onguens avec autres choses, comme du depuis toutes cinq l'ont confessé estans apprehendees par la Iusti-

ce, & menees à Laufane, où ie les ay veu
brusler, & faire leur procez.

La seconde histoire est d'un payfant
d'un village pres Lucens en Suisse, lequel
allant au bois, rencontra au milieu de la
forest vn loup qui luy courut dessus
pour le deuorer: ce que voyant le payfan
se mit sur sa deffensiue, & fit en sorte qu'il
luy coupa vne des iambes de deuant,
laquelle coupee, & l'effusion du sang s'en
ensuiuant, ce loup fut changé en femme,
laquelle au lieu d'une iambe auoit le
bras couppe: le payfan arriué en son vil-
lage, accusa la femme, laquelle fut ap-
prehendee & bruslee.

Or à propos de ceste histoire, il ne sera
trouué mauuais si nous publions vne
Maxime qui est tenuë entre les Vaudois,
& confirmee par la confession d'une infi-
nité de Sorcieres, sçauoir est qu'aussi tost
que les Sorcieres transformees, comme
il leur semble, en bestes, sont blessées, en
sorte que l'effusion de sang ensuiue la
blessure, leur forme illusiuë disparoist, &
sont recognües pour telles qu'elles sont
en effect, sçauoir est, femmes, ou hom-

mes, Outre ceste Maxime, ils en ont encores deux fort triuiales entr'eux, voire iusques entre les enfans; La premiere est, que toutes Sorcieres transformees en bestes par illusions diaboliques n'ont point de queuës, La seconde est, que iamaïs le Diable ne peut prendre la forme en tout & par tout semblable à vn homme, ce qu'aussi les Sorciers & Magiciens infames croient tous d'un commun accord, car ils confessent qu'encore que le Diable aye pris la forme d'un homme, qu'ils le recognoissent pour tel qu'il est par ses pieds, lesquels il ne peut changer en autre forme que celle des bestes, comme sont boucs, bœufs, & autres animaux, ils le recognoissent aussi par ses ongles, lesquelles il a lōgues & crochues, & ce selon leur asseriōs, nonobstant qu'à proprement parler le Diable n'ait aucun corps, d'autant qu'il est Esprit.

Quant à la realité de ceste metamorphose d'hommes en bestes, i'ay assez suffisamment prouué cy dessus qu'elle ne pouuoit estre reellement faite par aucunes choses naturelles, ny mesme par le

Diabie, iacoit qu'il y employast toutes ses forces, attendu qu'il ne sçauoit seulement faire vne mousche, Cela donc appartient à vn seul Dieu Createur & Conseruateur de tout ce qui a estre & mouuement.

Quelques vns non encores satisfaits des raisons & argumens sus-alleguez, isteront disans que ceste metamorphose ne peut estre phantastique, c. d. faite simplement par illusion, mais qu'il y a de la realité, d'autant que ce n'est pas aux Sorcierres seules qui se sont oingtes d'onguens, ou pris quelque potion, qu'il semble qu'elles soient changees en bestes, mais aussi à ceux qui les regardent qui sont de sens rassis, & qui n'ont pris ny onguent ny potions.

Ceste obiection ne meriteroit vne response particuliere, attendu qu'elle est comprise en ce que i'ay cy deuant respondu, outre ce que d'ailleurs nul n'ignore que le Diabie ne puisse esblouir les yeux des hommes, & faire voir en apparence choses qui ne sont point, comme il se pratique ordinairement par les enchanteurs

chanteurs, ce qui se peut aussi faire par des choses naturelles, comme par collyres, onguens, potions & parfuns, faits & composez de certaines choses, comme nous monstrerons à la fin de ce chapitre. Mais avant que passer outre pour satisfaire aux douteux, il conuient respondre à ceste obiection, pour laquelle soudre & vuidier entierement, il faut distinguer l'illusion des regardans d'auec celle des Sorcieres ainsi metamorphosees en leur entendemens; Car l'illusion de ceux qui regardent tels monstres n'est qu'exterieure, & est causee par vn seul sens, assauoir par les yeux, ausquels est representé vn phantôme sous la forme d'vne beste, & la croient estre vrayement beste, d'autant que les yeux trompez la representent pour telle au sens commun, & le sens commun à la cogitatiue, & finalement la cogitatiue la renuoye à la memoire. Or l'illusion & impression des Sorcieres est beaucoup plus grande, d'autant que tous leur sens sont trompez, tant interieurs, qu'exterieurs, & ce par vn autre moyen que ne sont trompez les yeux

des spectateurs , car premierement leur sens interieurs sont trompez de violentes impressions d'une vaine figure, & sont mesmes poussez de furie que leur excitent naturellement tels onguens, ou potions , de sorte qu'elles croient estre vraiment bestes, & à ceste cause ayant le ventre tourné contre terre à la façon des bestes marchent à quatre, se seruans des mains au lieu de pieds de deuant; Finalement estans ainsi disposees, le Diable les entourne d'air espoissi, qui represente exterieurement à tous les spectateurs la forme d'un loup, & emporte ainsi la Sorciere sous ceste forme par monts & vaux, Car les hommes ne peuuent voir le Diable que sous quelque forme corporelle, ou phantolme.

Ainsi en l'histoire de Saint Clement, nous lisons que Simeon le Magicien fist en sorte que tous les amys de Faustinian le mescongneurent, puis il dit à Neron l'Empereur, qu'il luy fist trencher la teste, l'assurant qu'il resusciteroit le troisieme iour; ce que fist Neron, comme il luy sembloit, & trois iours apres il re-

tourna , dequoy Neron estonné , luy donna vne statuë dans Rome , avec telle inscription , *Simoni Deo sancto mago. c. d.* Au Dieu Simon saint Magicien , & depuis Neron s'addonnat entierement aux forceries. Or Simon le Magicien auoit tellement fasciné les yeux de Neron & de toute l'assemblée qu'ils decolerent vn mouton au lieu de Simon.

Apulée recite le semblable de trois hommes qu'il pensoit auoir tué , qui estoient trois peaux de boucs estant fasciné par la Sorciere Pamphile : Le mesme ay ie veu pratiquer souuentesfois à des Enchanteurs , lesquels decouloient avec effusion de sang , comme il sembloit aux spectateurs , des ieunes enfans , & apres reprenoient la teste , laquelle sembloit estre separee du corps , puis l'agençoient ioincture contre ioincture , nerf contre nerf , puis ayans faits quelques ceremonies , ils inspiroient dedans , ce fait , l'enfant se releuoit soudain gaillard & dispos.

Ainsi aussi vn certain Gentil-homme nommé de la Pierre , de la ville de Grand-

son en Suisse, vendit à Hyuerdon à des Bourguignons en plein marché des bouchons de paille pour des pourceaux bien gros & gras, comme il sembloit aux Bourguignons qui les auoient maniez & sentis: Les pourceaux estans vendus, il leur defendit de les mener par vn ruisseau qui estoit entre Hyuerdon & Grâdson: Mais nonobstant la defense ils les menèrent par ce ruisseau, dans lequel estans entrez, les pourceaux disparurent & ne virent que des bouchons de paille que l'eau emmenat. Quoy voyant, bien estonnez, retournerent à Hyuerdon au logis que leur auoit assigné ledit de la Pierre, lesquels attendant s'estoit ietté sur vn liât, où il faisoit semblant de dormir profondement; les Bourguignons arriuez, la chambrière monte en la chambre pour l'esueiller, mais ne l'ayant peu esueiller par sa parole, elle fut contrainte de le tirer par l'une des iambes assez fort, laquelle luy demeura entre les mains, estant, comme il luy sembloit, separee du corps, dequoy bien affligée, pensoit l'auoir tué, & pour mieux en estre asseurée,

elle voulut regarder sa face qui estoit tournée de l'autre costé, Mais comme elle luy pensa tourner la teste de son costé pour luy voir la face, la teste luy demeura entre les mains separee du corps, comme il luy sembloit, quoy voyant, à pleurs & à cris pensant l'auoir entierement tué, descend en bas pour compter avec sa Maistresse & s'enfuir: Mais l'hostesse la voyant ainsi espleuree, & sur son despart, voulut sçauoir la cause qui l'esmouuoit à ce faire, laquelle ayant declaree avec grande difficulté, l'hostesse monte en la chambre pour sçauoir la verité du faict, ou estant arriuee, trouue ledit de la Pierre esueillé se pourmenant par la chambre, de sorte que les pleurs furent changees en risées, & rendit l'argent aux Bourguignons.

Le mesme estant en la Nopce d'un certain Gentil-homme, ou il y auoit plusieurs Dames & Damoiselles qui dançoïent seules en vne chambre à part, print un petit tambour qu'il gardoit à cest vsage, puis s'estant approché contre la porte pour le toucher doucement, au

premier son d'iceluy, les Dames croyoient que ce fust le bruit d'un ruisseau qu'elles virent à l'instant sortir de la muraille, comme il leur sembloit, lequel s'accroissoit, ou appetissoit selon qu'il touchoit fort, ou bellement le tambour. Ce voyant les Dames, comme rauies & enforcées, leuoient peu à peu leur robes de peur de les mouiller, & en fin le ruisseau s'accroissant de plus en plus, furent contraintes de lever & robes & chemises iusques au nombril, dequoy estant content le dit de la Pierre & les Spectateurs qui estoient en dehors avec luy, le fit diminuer peu à peu, & à la fin disparoir entièrement. Car s'il eut continué à le faire aggrandir, elles se fussent espouuantes, & peut estre fussent deffaillies par la crainte de se submerger.

Comme ce Gentil-homme ne se delectoit qu'à passer le temps plaisamment, vne fois allant voir ses metteurs sur le haut du iour, leur donna l'alarme, & la fuite, les tançant fort asprement de leur negligence, entant qu'ils voyoient bien l'ennemy à leur talons qui auoit tout

enuay le païs & ne daignoient encor se sauuer, ou secourir les leurs. Les Metteurs bien estonnez, regardans derriere eux virent vne tresgrande armée (car ils fit que du chaume, il leur sembla en apparence que c'estoit soldats & picquiers) de laquelle estât effrayés, gaignans tous aux pieds qui deça, qui dela sans s'arrester iusques à la ville, ou ils feurent mocquez.

Ainsi fut trompé vn Moine (comme raconte saint Hierosme en la vie des peres chappitre 28.) voyant le Diable sous la forme d'une belle femme qui l'allechoit souuentefois à l'acte Venerien, à laquelle le pauvre Moine voulant obtemperer, fut fait semblable au cheual & au mulet qui n'ont point d'entendement, car alors qu'il la pensa embrasser pour prendre son plaisir charnel, ce phantome, qui n'estoit qu'une ombre, s'escoula d'entre ses bras avec vn buglement horrible, & ainsi laissa le pauvre miserable avec grande mocquerie.

En ceste façon Lucian fut transformé en Asne, & redeuint homme apres auoir

mangé des roses qu'une chambrière luy auoit enseigné : Ainsi aussi Apulee fut transformé en Asne, & les Arcades en Loups : Ainsi estoient tranformez en cheuaux & asnes ceux qui (comme raconte Sainct Augustin) auoient mangé le fourmage empoisonné par les femmes gardiennes du bestail experimentees en cest art, & portoient les charges, qu'ont les cheuaux accoustumé de porter, & incontinent apres ils reuenoient en leur premiere nature; ce que le Diable faisoit afin de tant mieux autoriser son mensonge & imposture, de part & d'autre, Car, comme dit tres-doctement Sainct Augustin en la Cité de Dieu, ny l'esprit de l'homme, ny son corps, ne peuent estre veritablement (comme i'ay aussi monstre cy dessus) tranformez par art, ou puissance du Diable en membres, ou lineamens des bestes, d'autant que les Diables ne peuent creer les natures: Mais seulement peuent faire qu'une chose semble estre ce qu'elle n'est pas.

Laissons maintenant les ruses & impostures du Diable, & essayons de mon-

strer

trier que naturellement , & sans aucun
artifice des Demons , on peut voir , ou
faire apparoitre des choses estre , & qui
toutesfois ne sont point , & commen-
çons premierement par la Lycanthro-
pie.

I





DE LA LYCANTHROPIE NATURELLE.

CHAP. VI.



A Lycanthropie naturelle, est vne maladie appellee par quelques vns *Melancholic*, ou *Folie Louuier*, & par d'autres est nommee *Lycaonie*, ou *Cynanthropie*, à cause que ceux qui sont atteints de ceste maladie pensent estre transformez en loups, ou en chiens, ce qui leur aduient par les fumées de la melancholic aduste, ou cholere noire qui monte au cerueau & trouble tous les sens, & principalement l'Imaginatiue, laquelle est grandement offensee, à ceste cause ils croient ouyr & voir en dehors ce qui est en dedans, & consiste en l'humeur, & vapeur du cerueau, d'autant que les erreurs causées par la maladie de l'Imaginatiue depraue

par telle humeur & vapeur, sont traduites & renuoyees aux sens extérieurs: Parquoy ces Lycanthropes sortent de leur maisons principalement de nuict, & suivent les loups, comme les Cynanthropes les chiens, ils sont passés & ont les yeux enfoncez & haues, ils ne voyent qu'obscurément, comme s'ils estoient entournez de tenebres, ils ont la langue fort seiche, & ont soif, n'ayans aucune salive en la bouche, ils ont aussi les os des iambes tellement escorchez, à cause qu'ils s'y heurtent souvent, & que les chiens les y mordent, qu'à grand peine les en peut on guerir.

La cure de telle maladie est presque semblable en tout & par tout à celle des *Maniaques*, ou *Melancholiques*, desquels j'ay parlé en nostre liure intitulé, de *Veneficiis*.

Ainsi crois-ie que Lycaon Roy d'Arcadie (du nom duquel elle a aussi pris son nom de *Lycaonie*) à raison de ses meffaits, fust changé en loup par Iupiter, comme escrit Ovide au 1. liure de sa *Metamorphose*, quand il dit.

Il s'enfuit estonné, & trouuant le silence

Dans les champs esgarez qu'il quiert pour
demeurance

Il hurle, & vainement il s'efforce à parler.

Cecy peux-ie bien affirmer, à cause
que le Diable ne peut par plusieurs iours
de suite faire apparoir telles choses, ce
qu'aussi ne peuvent les potions, collyres,
ou onguens que pour quelques iours, les-
quels expirez, ou l'homme retourne en
son premier sens, la force de ces medica-
mens estant dissoute, & surmontee par la
nature, ou bien l'homme meurt vaincu
par la violence de telles compositions:
car tout ce qui est violent ne peut lon-
guement subsister en mesme degré.

Auicenne Medecin tres-renommé
entre les Arabes, à aussi remarqué que
plusieurs estans tourmentez par ceste
cholere noire & aduste, ont pensé estre
Lyons, ou Diables, ou oyseaux, comme
nous en auons allegué plusieurs exem-
ples au chapitre de la Manie, ou fureur
melancholique, liure de *Veneficis*. Main-
tenant voyons si par potions, collyres &
onctions on peut faire apparoirre telles,
ou semblables choses.



DES CHOSES NATV-
relles qui ont vertu de représenter à
l'imaginative choses qui ne sont
point presentes en effect,
mais seulement en
apparence.

CHAP. VII.



OVR ainsi que les sens des Ly-
canthropes ou Cynanthro-
pes susdits sont trompez & de-
ceuz naturellemēt par la ver-
tu des vapeurs & fumees interieures
qu'exhale la cholere noire en leur cer-
ueaux. De mesme aussi peuuent-ils estre
trompez, par potions, & poudres prises
interieurement, ou par collyres, onctions
& parfuns faicts à l'exterieur, composez
d'herbes, fruiçts, semences, racines, sucs,
bois, & de quelques parties de certains

animaux, lesquelles choses ont vertu de troubler & tromper les sens, en leur représentant des vaines figures des choses qui ne sont point presentes en effect.

De telles & semblables choses les Turcs composens vne certaine poudre qu'ils nomment *Heiran luc* (que ie tairay pour le present) laquelle estans prise au poids d'une dragme, ou environ, fait perdre la parole, puis incontine't apres cause vn ris & ioye à celuy, qui la prise, d'autant qu'il pense voir choses merueilleuses & plaisantes, & pour ceste cause fait derels gestes du corps qu'il esmeut les assistans à vne fort grande risée, puis estant venu en son bõ sens, il racõte qu'il à esté en diuers lieux, & qu'il a veu choses grandes & esmerueillables: On attribue aussi les mesmes vertus, ou pour le moins semblables à *Georephillide* quand elle est prise avec du vin, & de la myrrhe: Le *Stramonium* dit des latins *Solanum* en fait autãt, & principalement ceste espeece qui est dite des Italiens *belladonna*, & plusieurs autres: l'usage & composition desquelles choses ie tairay a cause des meschants qui tournent tout

à mal par leur affections deprauées.

Iehan Baptiste Porre Neapolitain raconte au huitiesme liure de sa Magie naturelle que quelques siens amys pouuoient quand bon leur sembloit par vne certaine potion aliener tellement vn homme de son sens, que facilement il se persuadoit estre methamorphosé, ou en oyseau, ou en autre animal, & ce selon la variable composition de telles potions, car d'aucunes fois ils faisoient vne potion, en vertu de laquelle celuy qui l'auoit prise se persuadoit estre changé en poisson, de sorte questans tombé par terre il estendoit ses bras & remuoit les iambes comme s'il eut voulu nager, quelques fois aussi il se secoüoit en tremblotant, d'autrefois il sembloit qu'il se submergeat. Ils faisoient aussi vne autre potion, laquelle alienoit tellement du sens celuy qui lauoit prise, qu'il se persuadoit entierement estre mué en oye, & becquoit l'herbe avec sa bouche & de ses dents frappoit contre terre comme font les oyes de leur bec, il chantoit aussi, & s'efforçoit de mouuer ses ailles.

Touchant ce meisme subiect, Iules Scaliger & Mathëole racontent vne hy-
stoire notable des ioueurs de passe passe:
Ils meslent, disent ils, la poudre d'une cer-
taine racine dans du vin, lequel estant
bëu, picque le palais, ce fait, ils comman-
dent à celuy duquel ils se seruent pour
donner passe temps aux autres de mouil-
ler le doigt en ce vin, puis le sucer, afin
de dire quel goust il a: Si tost qu'il l'a trë-
pé & mis en sa bouche, il est contrain de
le presser & mordre avec grand cris:
D'autre costé le Basteleur, faisant sem-
blant de le consoler, luy frote les temples
& le poignet d'un certain onguent, puis
tire vne piece d'argent qu'il laisse choir
expres, & l'exhorte de la recueillir: s'e-
stant baissé, il ne se peut releuer, & par la
vertu de l'onguent deuient comme in-
sensé, & tombe tout à plat, puis en mes-
me sorte qu'un qui penseroit se noyer en
l'eau, il nage, & crie que les flots de l'eau
l'emportent. Le Basteleur le redresse sur
ses pieds, ce faict, l'autre commence à
le regarder de trauers, & luy reproche
ces outrages, puis il semble courir sus au
basteleur,

Basteleur & le poursuiure, ce qu'il continue iusques à tāt que L'onguent soit osté, alors il reuient à soy, puis soudain comme vn qui seroit sorty: & eschappé du naufrage, il tord & espreint ses cheueux, sa barbe & ses habillemens, torche ses bras & se mouche fort.

Or afin que persone ne reuoque en doubte ces choses, joseray bien asseurer qu'on peut faire de certaines choses que i'ay descrites cy dessus, (en traictant de la composition des onguents des Sorciers) des potiōs particulieres par la vertu desquelles il semblera qu'on soit changé en l'animal duquel on aura meflé les arteres, cœur & cerueau en ladite potion; Et cas aduenant qu'on ne puisse auoir ces parties de l'animal qu'on desire faire apparoiſtre, on pourra simplement repaistre celuy, à qui ont veut donner telle potion de la chair de l'Animal auquel on desire qu'il soit changé par imagination, & quelque heure apres luy donner la potion, & on en verra l'effect, car s'il à mangé de la chair de bœuf il ne verra que des bœufs & croira estre changé en

bœufs: de sorte qu'il voudra ruër des cornes comme font les bœufs.

Ainsi Plin eſcrit que la ceruelle d'un Ours eſtâs priſe par la bouche dâs le t'eſt du meſme Ours, eſmeut tellement les imaginations qu'on deuient farrouche, cuidans qu'on ſoit chang   en Ours avec tout ce qu'   regarde, & ce ſans en reſſ  tir aucun mal par apres: Ce que d'aucuns aſſeurent auoir experiment   en la perſonne d'un Gentil homme Eſpagnol, lequel en eut la phantaſie tellement troubl  e que penſans eſtre tranſform   en Ours, il ſ'enfuit dedans les montagnes & deſerts.

A ce propos vn certain doct homme en quelques ſiens liures, eſcrit qu'il ſe peut faire certaines ſuffumigations & inonctions qui contraignent les dormans    parler, ſe pourmener, & faire des choſes queſtans eſueillez ils ne pourroyent faire, n'y meſme ne les oſeroient entreprendre, & pour preuue de cecy, il dit, qu'il ſ  ayt faire vn collyre avec le ſiel d'un h  me & les yeux d'un chat noir & quelques autres choſes qu'il ne nomme pas, lequel fera voir, & apparoiſtre en

l'air, ou ailleurs les ombres des Demons.

Le mesme auteur parlant des parfuns, dit, que si on se parfume avec de la semence de lin & de psellium avec les racines de violettes & d'ache, qu'on verra les choses futures, iten que si on faiët vn parfum avec la racine de bruyere, le suc de cyguë, de iusquiamme & semence de pavot noir avec quelques autres choses, qu'on verra des figures fort estranges, iten que pour chasser les mauvais esprits & phantosmes nuisibles, il faut faire vn parfum avec calament, pivoine, mente, & palma Christi. Il enseigne aussi qu'on peut assembler les serpents par le parfum des os de l'extrémité du gosier de Cerf, & qu'au contraire, on les peut chasser & mettre en fuite, si on allume la corne du mesme Cerf. Iten que l'ongle du pied d'extre d'un cheual, ou d'une mule allumée dās vne maison, chasse les souris, & celle du pied gauche, les mousches: Il dit aussi que si on fait vn parfum avec le fiel de seche, de thymiamas, de roses & du bois daloës, & qu'estant allumé on y iette dessus de leau, ou

du sang, que la maison semblera estre pleine d'eau, ou de sang, & que si on iette dessus de la terre labourée, qu'il semble que toute la terre tremble.

Cecy ay ie voulu escrire afin de mon-
strer combien sont grandes les forces de
la nature, & combien est par consequent
vaine, voire detestable la presomptiõ de
ces fots escriuains, qui pour ne pouuoir
entendre & cõprendre les grands secrets
de la Nature thresoriere de toutes les ver-
tus que Dieu à d'esparti aux creatures
qui sont soubs la concavité des cieux, ils
sont contraincts par leur brutale igno-
rance, quand ils voyent quelque chose
arriuer extraordinairement, d'en rapporter
les causes aux demons, non sans grande
impieté, car en ce faisant, ils semblent
vouloir establir vne seconde Deité: Ce
n'est donc de merueille si ignorans les
causes des choses, ils tombent en telles
absurditez, ausquelles ils ne feussent tô-
bes, s'ils n'eussent colloqué la science &
doctrine en vain babil & bonne opinion
deux mesmes contre tout droit de rai-
son, car la vraye science est appuyée sur

la cognoissance des causes lesquelles dependent d'une seule cause causante, qui est Dieu, lequel à la création à departi à une chacune creature, selon son espee & dignité, un pouuoir & vert particulieres, lesquelles elles ne peuuent outrepasser, & selon ces proprieté & vertus donnees à une chacune espee, Adam leur imposa leur noms pour les distinguer les vnes d'avec les autres: De surplus, il faut croire que comme Dieu est l'autheur de toutes choses, qu'aussi il en est le seul conserveur & protecteur, s'estant reserué ceste prerogative, de creer, donner vie, & changer les formes en autres, bref de faire tout ce que bon luy semblera de ses creatures, car c'est à luy seul qui les a faites & façonnées de les pouuoir, ou changer, ou destruire, & non à autre.

Ces fondemens posez, comme inexpugnables, il sera aisé de renverser les argumens de ces turbulens formez brutalement & reduits en la figure d'un Nescio, concluant par un Ergo. Mais pour reuenir à nostre subiect, quand ils entendent par les confessions des Sorcieres

qu'elles se transforment en loups, ou autres animaux, ils ne se contentent pas seulement de le croire: Mais passent outre, & maintiennent que le Diable le fait, & pour comble de leur impieté, ils adioustent par la permission de Dieu. Or avant que de precipiter ainsi son jugement, ne falloit il pas premierement aduiser si cela se pouuoit faire reellement, ou illusiuellement, Or selon la verité de nos fondemens & argumens cy dessus mentionnez, il ne le peut faire par aucunes causes naturelles, ou puissance du Diable, qu'un corps soit vrayement transformé en vne autre espece, D'où nous concluons que cela se fait illusiuellement.

Que si, pource que Dieu aucunes fois a fait & permis des miracles, il falloit croire indifferemment qu'encores communement il en fait, & permet, il n'y auroit aucune ferme & stable foy, & faudroit douter de toutes choses, voire (veu que Dieu peut faire l'opposite) des articles de la foy, laquelle est le fondement des choses qu'on espere, & certification des choses qu'on ne voit point, comme dit saint

Paul aux Hebrieux chap. 10. C'est pour-
quoy qui demanderoit aujourd'huy mi-
racles, ce seroit signe d'infidelité & de
mauuaise generation, comme il est escrit
en sainct Luc chap. 11. & en S. Mathieu
chap. 12. & 16.

Qui plus est, si ie voulois conceder
toutes choses estre, ou aduenir, que
Dieu a fait, ou qu'il peut faire, i'aurois à
croire de merueilleux cas; Mesmes si de
tel argument (Dieu a fait, ou peut faire,
doncques Dieu fait) il y auoit cause &
raison suffisante que Dieu fait, ou fera
cela, toute Philosophie & dispute des
choses diuines periroit, d'autant que
Dieu peut faire nouueaux articles, &
destruire les vieux & anciens. Que s'il
falloit croire toutes choses, comme veut
le Poëte Linus, pource que toutes cho-
ses sont possibles à Dieu, Certes toute
science, tant diuine que humaine peri-
roit, & tous les moyens de discerner le
faux d'avec le vray, nous seroient ostez,
d'autant que nous serions comme con-
traincts à croire les choses, voire les plus
estranges & enormes qu'on pourroit ex-

cogiter , & le plus souvent prendre le mensonge pour la verité , pource que la toute puissance de Dieu nous obligeroit à ce faire , nonobstant que nos sens & raison y repugnassent , voire mesme l'Escripture sainte: C'est pourquoy aujour d'huy nous voyons gens de grande literature & reputation estimer aucunes œuures quasi miraculeuses & par dessus nature , desquelles le sçauant en perspective, sçauoir est en science naturelle peult facilement rendu raison , & attribuent aucunes maladies aux Diabes, la cause desquelles est purement naturelle.

Au reste ie ne veux pas nier que Dieu par soy & ses seruiteurs n'ait fait plusieurs miracles , & que par les mauuais Esprits & Magiciens il ne face, ou permette qu'il se face, & n'ait fait maintes admirables & merueilleuses choses à son honneur , & au salut des bons & au euglissement des reprobuez , & non au contraire. Que si par violence de tourmens les mal faicteurs Magiciens, ou les miserables Sorcieres confessent & affirment auoir faict des cas espouuantables , il ne faut adiouter

ster foy à telles personnes, car vrayement ne les ont faicts, combien qu'elles le pensent & croient: Ce qui est confirmé au droict Canon. *c. Episcopi eorumque ministri* 26. q. v. où il est dit en substance. *Quand Sathan a saisi la teste d'une femme, & a subiugué ceste femme à soy par infidelité, subitement il se transforme en especes, ou semblances de diuerses personnes, & abusant en sommeillant l'Esprit qu'il tient captif, maintenant monstrant choses ioyesses, maintenant choses tristes, maintenant gens cogneuz, maintenant incogneuz, il la meine çà & là. Et combien que le seul Esprit endure & souffre cela, l'infidele pense que cela n'aduienne à l'Esprit, mais au corps.*

Que si on vient à resister aux choses susdites, disant que selon icelles il ne faudroit croire à aucun miracle: Nous respondons que la consequence n'est pas bonne & valable, veu qu'il n'y a miracle sans cause & raison, & qu'il n'y en a aucune meilleure que la foy de nostre Seigneur Iesus-Christ, pour laquelle ils sont faicts. Mais que comme l'Eglise n'a besoing de miracles, pource que la foy

Chrestienne est assez approuuee & confirmee, tant par miracles & martyres, que par grands & fort sçauans personnages qui ont sans doute consenti à iceux apres innumerables probations & questions. Aussi ne s'en fait-il plus, que s'il s'en fait, ils se font immediatement par Dieu, ou mediatement par ses Saints Anges & Seruiteurs, le tout à son honneur & gloire, pour se faire admirer & redouter dauantage, lors que nous sommes par trop lasches & retifs à faire nostre deuoir. D'où nous concluons que c'est vne heresie, voire blaspheme, de dire que Dieu donne telle puissance extraordinairement au Diable, ou que par son moyen il parface ces miracles, lesquels ne sont que pour confirmer les maluiuans en la seruitude du Diable, & authoriser leurs abominables & execrables assemblees conuoquées en mespris de Dieu & de sa parole, & pour la destruction du genre humain : Ne seroit-ce pas faire Dieu auteur d'iniquité, & destructeur de sa propre gloire ? Dieu dis-ie, qui est auteur de Iustice & de tout bien, &

qui s'eſt ſur toutes choſes reſerué la vengeance & la gloire. Ia n'aduienne donc que Dieu participe aux iniquitez des meſchans, comme couuertement le veulent inferer ceux qui maintiennent telles Metamorphoſes & Extaſes eſtre reelles.

Lij





REFUTATION DES
opinions & Argumens que Bodin
allegue au 6. chapitre de sa De-
monomanie, pour maintenir
la realité de la Lycan-
thropie des Sorciers.



E n'est pas assez d'auoir de-
monstré cy dessus que la
transformation d'hommes
en bestes, & transport de
l'ame hors du corps des Sor-
ciers, ne sont que pures fables & illusions
du Diable; Si nous ne refutons aussi les
argumens principaux, sur lesquels se
fondent ceux qui maintiennent telles
choses estre reellement faites, entre les-
quels Bodin tient le premier rang: C'est
pourquoy à present nous refuterons ses
opinions & argumens qu'il allegue pour

les soustenir, protestant n'estre poussé à ce faire par ambition, ou haine quelconque, Mais seulement pour maintenir l'honneur de Dieu, contre lequel il semble s'estre voulu armer, & oster la croyance de choses si detestables & ridicules à ceux qui pourroient auoir esté seduits par ses argumens, desquels ie monstrey la fausseté en les retorquant contre luy-mesme: Car luy, & ses adherans pour estre mal instruits tant en la foy Chrestienne, qu'en la Philosophie naturelle, ne peuuent aduoüer que cela se face illusiuement, ains estans par trop credules, asseurent telle transformation estre reellement faite par le Diable, pressez de rechef par l'impuissance du Diable, ils recourent à la permission de Dieu, par où ils descouurent de plus en plus leur ignorance, Car permettre vne chose, est authoriser, ou n'empescher celuy qui peut desia telle chose, de la faire, Or est-il que le Diable n'a iamais eu pouuoir de faire telles choses, ny deuant sa cheute, ny apres, s'ensuit donc que ceste permission est nulle, car posez le cas que Dieu le

permet, ou ne l'empeschat (s'il faut ainsi parler) si est-ce qu'il ne le pourroit exécuter, d'autant qu'il n'en a pas le pouvoir, & qu'il ne peut outre-passer ce qu'il a receu au commencement, ny mesme ne peut faire ce que selon la Nature de son essence il pourroit, à cause qu'il a perdu son liberal arbitre & est bridé, en sorte qu'il ne peut rien faire de luy-mesme, si Dieu ne le permet, Mais selon ceste permission le Diable ne peut rien des choses susdites, Doncques leur conclusion est fausse & inepte; Car qui a-il de plus ridicule que de bastir vn argument sur l'impuissance de quelqu'un à faire quelque chose, & puis apres en conclurre vne puissance du mesme de faire la mesme chose, est-ce pas se dementir soy-mesme, & asseurer que le froid est chaud, & que le chaud est froid? Icy doncques faudra qu'ils confessent auoir failly par ignorance, ou malice, ou bien, pour comble de blaspheme, qu'ils disent que Dieu donne telle puissance extraordinairement au Diable.

En quoy nous remarquerons trois ab-

surditez, voire heresies damnables, La premiere est, d'accuser Dieu de fauoriser plus le Diable que les Anges, & qu'aucune autre creature, Car nous ne lisons point en l'Escripture sainte que Dieu aye iamais donné telle, ou semblable puissance à aucune creature: La seconde, est d'accuser tacitement Dieu d'estre destructeur de sa propre gloire, de laquelle luy-mesme à dit si expressement en estre ialoux, & qu'il ne la veut communiquer aux creatures, d'autant qu'à luy seul est deu honneur & gloire: La troisieme, est d'accuser Dieu d'autoriser le peché en le confirmant par miracles qui surpassent entierement la nature tant des bons que des mauuais esprits, ce que toutesfois il nous enseigne auoir en horreur. D'où nous concluons que c'est vn blaspheme d'asseurer que Dieu permette, ou donne telle puissance au Diable ennemy de sa parole, & du genre humain, comme Boddin le maintient au second liure de sa Demonomanie chap.6. citant pour preuve hors de propos le passage de Iob, qui dit qu'il n'y a puissance si grande sur la

terre qui puisse resister au Diable ; La raison de cecy en est tres euidente , d'autant qu'il a receu vne essence spirituelle, qui est par dessus l'Elementaire; Mais cecy ne conclud pas pour cela que Dieu luy aye donné la puissance de changer les corps. Veu que Iob parle seulement de la puissance qu'il a receuë en sa creation, laquelle est encore bornée par la volonté de Dieu , à cause des esleuz , à laquelle ils resistent par la parole de Dieu.

Ce passage donc extorqué de Iob ne conclud rien , non plus que les autres qu'il corte & corrompt faussement, lesquels, afin que la verité en soit tant plus euidente , ie refuteray les vns apres les autres, commençant par celuy de *Nabuchadnezar*, lequel Bodin asleure auoir esté vrayement metamorphosé en bœuf, ce que (quand ainsi seroit) ne peut rien conclurre, Car si la transformation est vraye elle a esté faite immediatement par Dieu, comme le demonstre la voix du Ciel , & non par Sathan , duquel il n'est fait aucune mention, ioint que d'ailleurs Daniel ne dit pas qu'il ait esté vrayement changé en bœuf,

en bœuf, mais seulement il parle par comparaison, disant qu'il mangeoit l'herbe comme les bœufs, & estoit teint de la rosee du Ciel, pourquoy expliquer, il adiouste que le poil du corps luy creut & devint tellement grand qu'il ressembloit du poil aux Aigles, & des ongles aux oyseaux: Par ou nous voyons qu'il n'estoit vraiment bœuf, Mais que comme il ressembloit aux bœufs en mengeant le foin, & vivant par les bois avec les bestes, qu'aussi il ressembloit de son grand poil aux Aigles, & de ses ongles aux oyseaux, non pas qu'il fust Aigle, ou oiseau, non plus que vraiment il n'estoit point bœuf, encores qu'il creut estre tel, pour auoir le cœur & sens d'un bœuf: Car iagoit que Dieu seul eust peu le changer vraiment en bœuf, ou en pierre, voire le reduire à neant, en tant que le Createur peut faire ce que bon luy semble de ses creatures, si est-ce que quand Dieu veut punir & abaisser les hommes, il le fait ordinairement par maladies, famines, & guerres, comme nous voyons aux Pseaumes de Daud, à qui Dieu donna

le choix de ces trois fleaux, Car par iceux il abaisse l'orgueil & ambitioⁿ des grands, comme nous voyons en Herode, qui pour n'auoir donné gloire à Dieu, fut frappé de la maladie pediculaire, Saul par la guerre; Israël par la famine; Pharaon par les eaux.

Ainsi doncques est-il croyable que *Nabuchadnezar* fust, pour s'estre attribué la gloire qui est deuë à vn seul Dieu, frappé par vne vengeance diuine de ceste espee de melancholie noire, ou folie bovine, en sorte qu'en vn instant ses sens furent tellement troublez & changez, qu'il creut estre bœuf, & marcha à quatre, estant priué des fonctions de l'ame intellectuelle, C'est pourquoy, le peuple voyant vn si subit eschange, & ayant ouy du Ciel qu'il seroit chassé de la compagnie des hommes, il ne se faut esmerveiller s'il fut chassé, puis qu'ainsi le portoit le decret diuin: Ce que Daniel aussi semble expliquer, quand il dit, que les sept années estant expirees, qu'il leua les yeux au Ciel, & que son entendement luy fust rendu par apres, Par ou nous voyons clai-

rement qu'il n'estoit vrayement bœuf, mais homme : nonobstant qu'il fust priué des fonctions de la raison pour vn temps, lequel estant expiré, la maladie à aussi pris fin, de sorte que se commençant à recognoistre homme, & se louuant de la voix du Seigneur, & de sa vie bouine passée, laquelle comparee à sa grandeur & magnificence premiere, n'estoit rien que abiection & brutalité, recognut qu'un si subit & si grand eschange ne pouuoit auoir esté fait que par vn Dieu suprême, contre lequel il auoit péché par son orgueil; Ce qu'ayant recognu, il leua les yeux au Ciel, comme implorant misericorde, car celuy seul qui de grand & glorieux, l'auoit humilié, & rendu ainsi abiect & le plus contemptible de tous les hommes, le pouuoit aussi d'abiect & contemptible, faire le plus grand, & respecté de tous. Dieu donc l'ayant receu à misericorde, il retourna en son premier sens, & benit Dieu en luy donnant gloire.

Quant à ce qu'il adioust, qu'apres auoir beny & donné gloire à Dieu, que

sa forme luy retourнат (non pas que sa forme, c. d. son ame, luy fut ostee, mais estant priuee de ses fonctions, & comme enseuelie, elle luy fut renduë, c. d. il recognut comme par vn certain esueillement & mouuement de son esprit, que les fonctions de son ame commençoient à agir, dequoy il loua Dieu) ce n'est pas à dire qu'auparauant il eust la forme d'vn bœuf, car la raison & l'entendement ne logent pas dedans vn bœuf, Il ne faut point aussi entendre que ceste forme fust spirituelle, ou corporelle, car de la spirituelle qui est l'ame intellectiue, il en a desia fait mention, comme aussi de la corporelle, quand il a dit qu'il leua les yeux au Ciel, outre ce que la corporelle ne peut demeurer entiere sans la spirituelle : Par ceste forme donc, nous de- uons entendre l'ornement exterieur du corps humain, lequel auoit esté depraué & changé par la grande abondance des poils qui couuroient tout le corps, & des ongles excessiues en grandeur : Or d'au- tant que le poil & les ongles ne sont point parties du corps, mais seulement

excremens, à ceste cause i'ay dit que ceste forme n'estoit point corporelle, mais accidentale.

Par les raisons sus alleguees, il appert assez clairement que l'obiection de *Nabuchadnezzar* ne conclud rien, non plus que celle des Magiciens de Pharaon, lesquels Bodin asseure trop temerairement auoir conuertiy vrayement leur verges en serpens, & auoir fait des grenouilles, & pour toute preuue de son assertion, il allegue que si les serpens des Magiciens n'eussent esté que bastons, que le serpent de Moysse ne les eusse pas peu digerer: en quoy il se monstre du tout ferial, comme si Dieu qui a conuertiy la verge de Moysse en serpent mouuant, & viuant, ne pouuoit aussi faire que ce serpent deuorast les verges des Magiciens, lesquelles en apparence sembloient à Pharaon, & aux autres qui auoient les yeux esblouis par les enchanteurs estre vrayes serpens.

Mais Dieu à qui rien ne peut estre caché, pour monstrier que le mensonge ne peut durer & resister à la verité (laquelle

est Dieu mesme,) permet que le vray serpent deuorast les faux serpens des Magiciens, afin qu'à luy seul demeurast tousiours la gloire, puissance & honneur. Ainsi quelquefois la verité est combatuë par le mensonge, & pour vn temps demeure obscurcie, Mais à la parfin vient tousiours en euidence, & destruisant le mensonge demeure victorieuse.

C'est donc imposture de dire que le serpent de Moyse n'aye peu engloutir, ou digerer les bastōs des Enchanteurs, comme si ce serpent fait extraordinairement par la puissance de Dieu, ne pouuoit à sa volonté les engloutir, & digerer, car ce n'est pas chose moins possible que le serpent de Moyse engloutisse, voire digere les verges des Enchanteurs, qu'il a esté possible que de la verge de Moyse, il en aye esté fait vn serpent mouuant & viuant.

Mais disputer inclusiuement de la puissance infinie de Dieu qui a fait tout de rien : ou bien aussi disputer naturellement des miracles que Dieu fait extraordinairement & supernaturellement, pour

confirmer sa parole, & se rendre redoutable aux hommes, n'est-ce pas impieté & blasphème ?

Parquoy temerairement Bodin assure que les Enchanteurs à l'ayde du Diable ayēt chāgé vrayemēt les verges en serps, produits grenouilles, & rougy les eaux, Car il impose à l'Escripture sainte, laquelle nous enseigne le contraire, & notamment en Exode, où il est dit que les Enchanteurs faisoïēt le semblable par leurs enchantemens : Or s'ils le faisoient par enchantemens, comme il est notoire, ce n'estoit point simplement, mais en apparence, en mettant deuant les yeux du Roy la feinte figure d'un serpent : Car, comme dit tres-doctement Iamblique au liure des Mysteres, La fin de l'art Magique est de ne point faire simplement, ains seulement de faire voir en apparence les choses qu'on imagine, desquelles incontinent on ne void ny pied, ny aille, ainsi qu'on dit en commun proverbe.

Cecy aussi confirme Sainct Clement, quand il dit, que les Magiciens de Pharaon sembloient plustost faire des signes, que

veritablement en faire: A ceste cause les feints serpens des Enchanteurs ont esté engloutis par le vray serpent de Moyse, en signe & reuelation de l'imposture, & euidence de la verité: Cecy aussi est confirmé par Solomon au liure de la Sapien-
ce, chap. 17. ou, en descriuant les iugemens de Dieu sur les Egiptiens qui detenoient captif le peuple de Dieu, il dit au verset 7. que les illusions d'art magique estoient abatuës avec honteuse reproche de l'orgueil qu'il auoient de leur science. Le mesme, parlant de la punition espouuentable des Egiptiens, dit au chapitre 18. verset 13. que ceux qui n'auoient creu à cause des sorceleries confesserent à la mort des premiers nez, que le peuple d'Israël estoit fils de Dieu.

Par où il appert que tout ce que faisoient les Magiciens de Pharaon n'estoit qu'illusion & imposture faite à l'ayde des diables qui esmouuoient les humeurs commodes à receuoir ces illusions, & pouuoient remplir de telles apparences que bon leur sembloit, l'esprit visuel des Egiptiens qui dependoient des Magiciens,

ciens & estoient idolatres, & par consequent idoines vaisseaux & organes de Satan.

Ainsi les Turcs ont leur sorceleries à l'aide desquels ils ramènent par force les esclaves qui s'en sont fuis, car apres avoir fait des imprecations & prononcé des paroles estranges & horribles contre l'esclave. Alors par la puissance du Diable le fugitif estime que son chemin soit plein de dragons & de Lyons, où que la mer & les rivières desbordēt pour le venir engloutir, où qu'il est en tenebres, & ces effrois le ramènent à son Maître.

Pour retourner à nostre propos Iustin martyr en l'exposition des questions proposées aux Chrestiens, question 26. maintient que les miracles des Magiciens de Pharaon n'estoient pas vrais miracles, ains ouvrages des diables qui charmoient les yeux des regardans, Mais qu'est-il besoing de disputer davantage, puisque Sainct Paul mesme au second chapitre de sa seconde Epistre aux Thessaloniens, parlant de la destruction & faux miracles de l'Antechrist, dit que sa

presence est selon l'operation de Satan, avec toute puissance, signes & miracles de mensonge, & avec toute seduction d'iniquité en ceux qui perissent; & adiouste au verset suiuant, qu'à ceste cause Dieu leur enuoyera efficace d'abusion à ce qu'ils croient à mensonge: D'où nous pouuons aisément recueillir que plusieurs seront seduits par les miracles mensongers de ce fils de perdition, & que tout ce que les Magiciens font, est illusoire.

Cecy est aussi confirmé par Sainct Augustin, en expliquant ce passage de Sainct Paul, où il dit que ces signes & prodiges sont appelez mensonge, ou, pource qu'on les verra, combien que ce ne soient que phantomes, ou, pource qu'ils pousseront les hommes en erreur. Concluons donc avec Sainct Augustin, qu'encore que les diables par leur grande viffesse puissent oster & faire esuanouyr quelques choses, au lieu desquelles ils peuvent supposer des dragons, des serpens, ou autres semblables choses, que neantmoins il ne faut pas penser que la matie-

re de ces choses visibles soit assubjettie au vouloir des Anges transgresseurs, ains seulement à celuy de Dieu, qui s'est reserué la prerogatiue de creer & transformer les creatures en d'autres especes. Or icy faut-il encore noter que le diable ne peut pas tousiours quand bon luy semble faire telles illusions: Item, que ceux qui ont les yeux purs & ouuerts par l'Eternel ne peuuent estre deceus par telles illusions, ains voyent simplement la chose telle qu'elle est, comme nous lisons d'Hylarion qui voyoit simplement, & recognoissoit celle estre femme que le commun peuple estimoit & croyoit estre vne lument.

De surplus, il faut remarquer que ces illusions ne se font pas tousiours par les malins esprits, Mais aussi quelquefois par les bons Anges, ou par Dieu mesme immediatement, qui a façonné & l'ouye & la veüe, & ce à la priere des fideles, comme nous lisons au second liure des Roys chap. 3. où il est dit que les Moabites ayans entendu que Ioran & Iosaphat Roys d'Israël estoient montez pour ba-

tailler contr'eux , ils assemblerent tous ceux qui pouuoient porter armes, & au dessus , & se tindrent sur les marches; Le lendemain au matin le Soleil estant leué sur les eaux, Les Moabites virent vis à vis les eaux rouges comme sang, puis dirent, c'est sang : les Roys se sont entrebatus, & se sont frappez l'un l'autre : Maintenant, ô Moabites, à la despoüille: & s'en vinrent aux tentes d'Israël : adonc les Israélites s'esleuerent & frapperent les Moabites, lesquels s'enfuirent deuant eux, & & entrèrent & frapperent les Moabites, & destruirent leurs villes.

Au mesme liure chapitre 6. nous lisons aussi qu'à la priere d'Elisee dieu frappa d'aucuglement les Syriens, qui auoient selon le commandement de leur Roy enuironné de nuit avec vne grande armee la ville de dothain , ou Elisee demeuroit pour le prendre, Item, qu'aussi à la priere d'Elisee dieu ouurit les yeux à son Iuuenceau pour voir l'armee celeste, de laquelle Elisee se voyoit estre enuironné, pour le garantir de tout danger, & l'asseurer contre ses ennemis.

Au mesme liure ch. 7. vers. 6. nous lisōs que le Seigneur fit que le cāp des Syriēs qui tenoit assiegée Samarie, entendit vn son de chariots & de cheuaux & d'vne grande armée, tellemēt qu'ils dirent l'vn à l'autre, Voyla le Roy d'Israël à loüé les Roys des Ethiens & les Roys des Egiptiens pour venir contre nous, & se leuerent & s'enfuirent au poinct du iour, & laisserent leur tentes, leurs cheuaux, leur asnes & le camp comme il estoit & s'enfuirent pour sauuer leur vie.

Parquoy faussement Bodin à voulu prouuer le contraire en peruertissant le sens de l'Histoire sacree, d'où il ne se faut pas esbahir si apres auoir imposé à Moysē & daniel, il rasche de persuader estre vraiment & reellement fait, ce que raconte simplement Iean Tritesme Abbé, assauoir que l'annee 970. il y auoit vn Iuis nommé Bayan, fils de Symeon Prince des Bulgares, qui se transformoit en loup, & se rendoit inuisible quand il vouloit. Or qui est celuy tant soit peu versé aux lettres, qui assure qu'vn corps composé de quatre elemens puisse estre ren-

du inuisible naturellement à nostre œil sain & entier en plein midy, ou de nuict à la clairté : Si telle chose estoit vraye, ne faudroit il pas confesser que le corps se reduisit en atomes de Platon? & qu'après il se reünit en vn corps par la concurrence de l'influence des astres, comme enseigne Platon, que si cela estoit, la forme seconde du corps seroit dissemblable à la premiere, d'autant que tout Indiuidu de quelque espee que ce soit, reçoit tousiours en sa naissance quelque chose de particulier, pour le discerner d'avec les autres de son espee, Mais comme ces atomes ne sont que songes & refueries estranges de Platon, ou plustost chimeres basties en l'air, semblable est aussi la conclusion de Bodin. doncques puis que ceste inuisibilité ne se peut faire, attendu que la nature des corps composez y repugne, Je concluds que c'est illusiuement, comme l'est aussi la transformation en loup. Or nonobstant que ces choses s'accordent en ce qu'elles sont faites toutes deux par l'artifice du diable, si est-ce qu'elles different eu esgard à leur fin, Car

l'une fait voir ce qui n'est pas, & l'autre empesche de voir ce qui est : En la premiere, l'Imaginative est trôpee par la representation d'une feinte & vaine figure; En la seconde, les yeux sont esblouys & charmez, ou bien le diable destournoit & empeschoit les yeux des assistans de regarder le corps de Bayan, lequel il auoit pris, comme en sa protection, & sous son ombre : Comme donc le corps de Bayan estoit rendu inuisible par illusion diabolique, Aussi semblablement il estoit transformé en loup illusiuellement par le mesme artifice du diable, duquel il estoit esclau.

Ainsi Circé Sorciere iadis fort renommee changea illusiuellement, comme raconte Homere, les compagnons d'Ulysse en pourceaux par potions, & non reellement, comme le maintient Bodin, dequoy Sainct Chrysostome le dement, quand il dit que la Sorciere Circé auoit tellement abesty les compagnons d'Ulysse par voluptez bestiales qu'ils estoient comme pourceaux, par ou il demonstre tres-clairement que leurs corps ne fu-

rent pas changez : mais seulement que leur raison fust abestie & abrutie par leur appetits desordonnez, & intemperance. Ce qu'aussi confirme Socrate (comme raconte Xenophon au commencement des dits & faits de Socrate) Car apres auoir loüé la temperance, & donné quelque precepte pour l'obseruer, il dit qu'il estime que Circé à changé en pourceaux ceux qu'elle nourrissoit de plusieurs & diuerfes viandes, & qu'Vlisse en partie par le conseil de Minerue, & en partie par son abstinence, auoit esté guaranty d'un tel abrutissement : Ainsi les Poëtes ont feint les Arcades auoir esté changez en loups, d'autant qu'ils viuoient en façon de loups : car comme hommes cruels & rauissans, ils se nourrissoient de chair crüe, & par aduenture de l'humaine. Tres à propos Plin se mocquant de telles resueries, dit que l'on doit tenir pour certain que c'est vne chose fabuleuse de dire que les hommes soient conuertis en loups, & puis retournent à estre tels qu'ils estoient, ou bien de croire toutes les choses fabuleuses que nous pensons estre aduenües

aduenuës aux siècles passez : Le mesme au liure 10. chap. 44. adiousté que c'est vne chose esmerueillable combien s'est estenduë la fole croyance des Grecs, car il n'y a mensonge si impudent qui n'ait son tesmoing.

Mais pour retourner à nostre Bodin, Voyons si les argumëts qu'il allegue pour prouuer que le Diable peut separer l'ame du corps des Sorciers pour la y renvoyer apres, ont plus de force que ceux qu'ils a cy-deuant cotté pour maintenir la transformation d'hommes en bestes, & commençons par celui de Virgile (lequel il cite mal à propos) contenu au 6. liure de son *Æneïde*, ou discourant des enchantemens de la Sorciere Circé, tant celebrée par les Poëtes, dit, *Quæ se promittit soluere mentes*, c'est à dire, qui se vante de pouuoir raur l'esprit en extase; ce qui se doit entendre par forte & assidue meditation & contemplation des choses hautes, auxquelles l'esprit estant comme conioint & attaché, il s'oublie soy-mesme, & est comme absent de son corps, & deslié des sens: Il ne faut pas donc enten-

dre ceste extase estre vne separation de l'ame d'auec le corps, comme le veut inferer Bodin, car de cela Virgile s'en moque, & raconte simplement les vanteries ridicules de Circé, sans rien en asseurer: Car il n'y a homme tant soit il abestty qui croye que par aucun moyen du Diable on puisse tirer la Lune du Ciel, faire retourner contre mont les riuieres à grand haste, changer les montagnes en valees, & les valees en montagnes, faire sortir les ames des damnez des Enfers, oster la lueur & clarté aux Astres, suspendre la terre, deprimer les Cieux, & faire retrograder les Astres, & semblables autres choses, lesquelles la sus-nommee Sorciere se iactoit à faux pouuoir faire, & toutesfois ne peut iamais attirer Vlisse à son amour par tous ses artifices, nonobstant qu'elle en fust tellemēt passionnée qu'elle en deuint furieuse & comme enragee. Par où il appert plus clair que le iour que toutes ses vanteries n'estoient que pures mensonges & vanité, car il n'est au pouuoir de faire telles choses qu'au seul Createur auteur de tout bien: Mais comme

une absurdité posée, il en ensuit plusieurs autres, c'est pourquoy Bodin ne s'est pas contenté d'avoir voulu soutenir ce prétendu transport d'ame, ains a passé plus outre adioustant qu'à dire vray l'ame Vegetative, Vitale & Animale demeurent, encore que les sens, mouvement & raison soient desliés : Argument du tout monstrueux & pueril ! car qui a jamais veu vn Animal sans sentiment, & sans vie animale & mouvement, puis que c'est le sentiment & mouvement qui font l'animal, & qui le distinguent d'avec le Vegetatif, comme fait l'ame intellectuelle les hommes, d'avec les autres Animaux : Pour preuve de ce que dessus, il cite & depraue l'Histoire de la Sorciere, de laquelle Iean Baptiste Porte fait mention en son liure de la Magie naturelle, & laquelle nous auons cy-dessus au long descrite, Car au lieu de ce que Baptiste Porte dit, que tout ce qu'elle leur respondoit estoit faux, luy au contraire, dit que les nouuelles qu'elle racontoit de plusieurs pays furent auerées, en quoy on peut recognoistre sa fidelité à citer les auteurs :

Quant au second argument qu'il allegue, sçavoir est, que tous les simples soporatifs ne sçauroient empescher que l'homme tant soit, il endormy ne sente le feu appliqué au cuir, & que neantmoins les Sorcieres ne sentent ny feu, ny douleur quelconque, estans rauies en extase, A cest argument nous respondrons par distinction, car il faut distinguer le sommeil causé seulement & simplement par les medicamens narcotifs, d'auec celuy des Sorcieres, lequel est causé par les medicamens qui ont non seulement vertu d'endormir tres-profondement, mais aussi de représenter diuerses choses en la phantasie, outre celles que le Diable y moyenne, ce qui est cause que la Ratiocinatieue des Sorcieres estant fort intentionnée sur les figures que le Diable & tels medicamens moyennent) elles sentent moins que les autres simplement endormies & assopies, sans auoir l'Imaginatieue troublée par aucunes figures, à quoy leur ayde beaucoup le Diable, car il luy est fort aisé de leur oster tout sentiment pour quelque temps, afin que ses ruses

ne soient descouuertes : Ainsi par plusieurs fois i'ay veu donner la question à des Sorcieres , aux pieds desquelles , encore qu'on eust attaché vne pierre pesante enuiron deux cens liures , si est ce que elles ne sentoient aucune douleur , & ne se mouuoient non plus qu'une souche , car le Diable (comme apres plusieurs ont confessé) estoit entré dans elles , qui leur ostoit & le sentiment & le mouuement de la langue. Ainsi plusieurs s'estans charmez à l'ayde du Diable (auquel ils se donnent en garde pour 24. heures) résistent aux basses d'arquebuses , & aux trenchans & pointes des espees , sans en receuoir autre mal qu'une contusion noire : Par où il appert que l'argument de Bodin est en toutes ses conclusions faux & inepte , comme l'est aussi celuy qu'il a mis pour son dernier refuge , & auquel , comme il dit , on n'a point encore respondu. Pour prouuer donc que ce n'est pas ny l'onguent , ny le sommeil , mais vn vray rauissement de l'ame hors du corps , il dit que tous ceux qui sont ainsi ravis , retournent demy heure apres , & aussi tost

qu'il leur plaist, & que cela est impossible à ceux qui sont endormis par simples narcotiques : A quoy ie responds qu'il n'est non plus malaisé à Satan de dissiper & chasser toutes ces vaines figures en esueillant le corps, que d'esmouuoir telles representations, endormir & assopir les sens.

Ces Argumens avec les sus-alleguez suffiront à present pour la refutation de l'opinion erronée de Bodin, Parquoy nous concludrons suiuant les tesmoignages cy-deuant cottez tant de l'Escripture Saincte, que des Peres, tant aussi des anciens Theologiens, que des modernes, & mesmes des Philosophes & Payens, qu'il n'est à la puissance du Diable, ny des Sorciers de transformer vn corps en vn autre, ny aussi de separer l'ame du corps pour quelque temps, pour la y renuoyer, & que celuy, (suiuant les Decrets) est plus meschant qu'un Payen & infidele, lequel pense que par vn autre que le Createur de toutes choses, vne creature soit créée, ou transmuee en mieux, ou pis, ou transformée en autre espece, ou similitude.

A Dieu donc seul sage, immortel & invincible,
soit honneur & gloire eternellement.

Amen.

F I N.

NOus soubs-signez Docteurs en la
Faculté de Theologie à Paris, cer-
tifions auoir veu & leu ce present
liure intitulé, *De la Lycanthropie, Transfor-
mation, & Extase des Sorciers*, composé par
le Sieur DE NYNAVLD, Docteur en
Medecine, auquel liure n'auons rien
trouué que de conforme à la Foy & Do-
ctrine de l'Eglise Catholique, Apostoli-
que & Romaine. Fait à Paris ce sixiesme
Auril 1615.

M. COLIN, Syndic.

FORGEMONT.

Nota, pag. 84. ligne 8. où il est dit que le
Diable a perdu son liberal arbitre, il le
faut entendre particulièrement du bien.

Extraict du Priuilege du Roy.

PAr grace & Priuilege du Roy, il est permis à Jean Millot Imprimeur & Libraire en ceste ville de Paris d'imprimer, ou faire imprimer vn liure intitulé, *De la Lycanthropie, Transmutation, & Extase des Sorciers*, cōposé par le Sr. de Nynauld, Docteur en Med. Avec deffences à tous Imprimeurs & Libraires, & autres de ce Royaume l'imprimer, vendre, ny debiter, en quelque sorte & maniere que ce soit, à peine de cinq cens liures d'amende, applicable moitié aux pauvres, & l'autre moitié audit Millot, confiscation des exemplaires contrefaits, & de tous ses despens, dommages & interests: & ce pour le temps & espace de six ans entiers & accomplis, Nonobstant Clameur de Haro, Chartre Normande, ou autres lettres à ce contraire: Et outre, ledit Seigneur veut qu'en mettant vn Extraict dudit Priuilege au commencement ou à la fin dudit liure, il soit tenu pour deuëment signifié, comme plus amplement est déclaré es parentes de sa Majesté. Donnée à Paris le 9. d'Avril 1615.

Par le Roy en son Conseil.

Signé,

RENOVARD.

Ledit Millot à consenty & accordé que Nicolas Rousset, aussi Libraire en ceste dite ville iouisse du contenu audit Priuilege, ainsi qu'il a esté accordé entr'eux ce 14. dudit mois & au pardeuant Notaires.